

Polgo Hasia Pas Deli Korin Dabeba Aşani

Hasia nedebo tau sabo po

Polobadu te bidi Pol bidali sogo, aga digi te bulu Korin genuai taun me deli te provins to pedai Akaia bulude te Grik dabego moni to pedai tomoba pelama, tama te moni genuai hanu Korin teba sabolama, tama Kraisi Jisasgo po te Korin we bidi dabebolo pusali. Te Korin hanu dwai nogi elaluali, te dwai dwai penani se ebo hanu wai, tama tibo god hauwa tede elaluali. Te Korin we bidi mebago te Godigo po bugagia odali. Tama nosali Pol aga te gasa hanu nogi Efesus tede bidibadi, agai e pas te Korin bagebolo asena tolali. Agai odali, te hani augwa hasi tomode pebeda pali. Tama bidi me deligo dwai penani se yali. Tama te Korin bage augwaligo pas te Polba asena toloyu, tama haniani kolesaga ebode te augwaligo aga po hanalu wali. Tama Pol agai te hanalu wali po wei ponoyu, tama aga homu me Godigo homu dali si augwalibolo pusa mani.

Polgo moni homu te Jisasgo po wali pabo te Korinde bidalubo we bidide yali, tiyu augwaligo konealubo homu daŋ wabo te bomu kimi meni dali weyu yali. Tama augwaligo wiegi yai kolesaga yali te dolidali homu yai. Agai te we de bidi si deliba dagana selama bidu ebo te doloba pai kolesagade po weyu, tama te sege dabe pedalubo si te Godigo Tedali Mobo Bidigo te augwali bilibo dodolomainu yabo po weyu yai.

Agai te lotu wabo wiegi yai kolesaga ebo po me te haniani gasagi yai homu kolesaga te Tedali Mobo Bidigo te Jisas wali pabo bagede ebo po wali. Tama me te isali bidi dabe ma hodalueibao po wai dao.

Te tama tigidali se dabego te Korin dabeba sege mobaso, te bidi Polgo te wiegi yai mu pogo te augwali tau somainu eyu te Godigo ebo homu kolesaga konemainu yali. Te e bukude dai me badude te Genuai Bidi wali pabo bagego homu godolo ebo po te buku Dai 13 tede te po elalubao. Te daide te tiwai po te gasa bidi hasi homu godolo ebo po wali elalubao, te hasia mu Godigo aga we bidi dabeba mani homu kolesaga te dao. Dago te tama kolesaga wali pabo usu dao.

Te Genuai Bidigo po wali pabo bagego augwa digi augwa nogi ugaba sabo konila po me olamuo po wai

(Dai 1-4)

¹⁻² Ena Pol da, tama Godigo digi aga homugo konea pelama tama agai ena i olama, te Krai Jisasgo tagala palali bidi seba muani. Ena dali dago ama Sostenes dadi sigo e pas te dage Korin moni hanude bidalubo Godigo we bidi hanibolo asena tolobao. Dage te Godigo dwai se me isabo wiegi yai we bidi pedalomai eyu agai dage i wai dao. Tama dage Krai Jisas dali wadolama, tama dage dali te tigidali bulude bidalubo we bidi augwaligo te dago Genuai Bidi Jisas Kraibolo lotu po wabo bage dali, te da

tigidali Krajs Jisas dali wadoloyu tama Godigo we bidi hani bidibo dao. Aga da, te augwaligo me te dago me Genuai Bidi dao. *

³ Eno homugo dago Aya God dali, te Genuai Bidi Jisas Krajs dali, augwali sigo te augwa olo tau sabo kolesaga me, te bidi homu dua digi nagame ilibo kolesaga dali si te dagebolo mao.

Polgo Godiba puba hwi po wali

⁴ Eno gedu haluasa po weyu, tama tigidali sogo eno te ena Godibolo dagede puba hwi po wabo dao. Magi baso meni, dage Krajs Jisas dali wadolobaso Godigo dage olo tau siduai dao.

⁵ Dage Krajs dali wadoloyu tama Godigo bomo dagebolo mayu, dage te tigidali dwagi yai kolesaga ebode te dage usu mu dao, sqa pabeo. Tama tiyu, dagego te Godigo po kuna koneyu tama gasa we bidibolo pusubo se te dage usu nubo dao.

⁶ Te Krajsde ola mani po te dagego bugagia mu odolama te sai dao. Tama selama, tama dagego ebo kolesaga hasegelebaso, te gasa we bidi dabe augwaligo sulama tama augwaligo koneai, dagego te Krajsde ola mani po mu odobo dao. Tama tibaso,

⁷ te Godigo dagebolo maiabo wiegi yai se yabo bomo tigidali dagego sai dao, tede dage sqa peyu habuge me ebeo. Tama dagego tama selama, dagego dago Genuai Bidi Jisas Krajs hania pedalabo sogo asobo tonaluyu bidibo dao.

⁸ Tama agai te dagego agade konealubo po dau weyu agaba homugo tialubo kolesaga, te agai bomo ilama, tama te tigidali nai silabo sogo usu

* 1:1-2: Tpi 18:1

nigi paibao. Agai tama tiyu, tama dago Genuai Bidi Jisas KraiS aga ma asobo sogo te sogo dage seḡe meni yai we bidi pedalaibao.

⁹ Te God aga digi dage aga ogwa Jisas KraiS dali wadolomainogo eyu tama dage i wali bidi, te tiwai God aga digi da te agai homugo dage dali keḡ pai bidi mu dao, te dage agaba tiḡ pabo te usu dao.

Te Korin dabe augwa hasi bugulama hani si sela pedalai

¹⁰ Ama dedeo, te dago Genuai Bidi Jisas KraiS agai aga nogigo bomo enabolo mobaso, eno homu dene ebadi te nogi bomogo eno e po dagebolo megi obao, dage tigidaligo deli homu naga eyu tama po deli tama wao. Dage si sela pebeda pigimio. Te mu menio. Dage bidibo deli hani tama bidiyu, deli homu kolesaga naga dali, te deli seḡ yabo homu dali te seḡ yao.

¹¹ Eno te po dagebolo magi baso obawe? Woo, eno ama dede, te dage tomode bidibo we nogi Kloe, aga bede bidibo bage meba augwaligo enabolo wali, duga hasi tomode wado ebo wali.

¹² E tiwai dao: dage tigidali deli deligo gasagi gasagi yai po wabo. Me badugo te po wabo, “Ena Pol wali pabo dao.” Me badugo te po wabo, “Ena Apolos wali pabo dao.” Me badugo “Ena Pita wali pabo dao” wabo. Tama me badugo “Ena KraiS wali pabo dao,” te po wabo. *

¹³ Tega! Magi yaliwe? KraiS tomode pebeda pali elaluba agawe? Ena Pol, te ena dage tobade te ni pedaide isaliwe? Te dage baptais yalide, te

* 1:12: Tpi 18:24

ena Pol wali pomainogo eyu tama dage baptais yali dawē? Te mu meni.

¹⁴⁻¹⁵ Dage tomode eno baptais yali te Krispus dali Gaius dali te bidi sidigi da. Gasa bidi meni. Tama eno te we bidi hauwa te baptais masiḡbaso, ena dwagi yai homu ebo dao. Magi baso meni. Te eno we bidi hauwa te baptais magi sogo da, teda augwaligo te “Da Pol wali peyu tama baptais salio,” te po augwaligo wagi da.

¹⁶ E, eno megi tama ma kone palali, te bidi Stefanas dali aga hani dali digi te me eno baptais mani da. Eno gasa me baptais maniwe ma maniwe, te eno konebeo, kegeda pai.

¹⁷ Tama Kraisgo ena tagala palali te we bidi baptais emainogo tagala palobeo. Menio. Agai ena tagala palali eno te Godigo wiegi yai gesi po te we bidi augwalibolo pusementainogo tagala palali. Tama tiyu agai homugo eno te tḡde koneai bidi dabego wabo pogo agai gesi po page ola menamuo te homu yai. Te Krais aga te ni pedaide isibogo bomu eno dolidali weyu tama eno te tḡde koneai bidigo po pusubo kolesaga wali pabo meni.

Godigo wiegi yai homu kolesaga dali agai genuai bomu dali si po

¹⁸ Eno koneani, te augwali digi dolobo sḡ ebo tḡḡdu pabo we bidi augwaligo homu te Krais ni pedaide isali po te homu kolesaga meni yai bidigo wabo po naga dao. Tiali goli te da Godigo ma dobola sabo we bidi, te dago homu te po da te Godigo genuai bomu hania ola mabo po dao.

19 Tama tede te Godigo po aseani bukude Godigo wali po me deli e tiwai elalubao: “Te eno te t̄de koneani bidi dabego homu kolesaga dolaibao, te haniani sēde polo konea pabo

bidi dabego homu kolesaga ena sela sāwaibao,”* Godigo te po wai.

20 Tama Godigo te po polobadu obaso, te t̄de koneai bidi dabe augwali magi yaibawe? Te buku hauwa elalubo po page konebo bage, augwali me magi yaibawe? Ma, te gasa bidigo homu bega sabo po bugagia wabo bage, augwali me mena sē me elalubawe? Menio. Godigo dabolo hanilama hania ola mawai dao, te e t̄de elalubo wiegi yai homu kolesaga te olo nai tiwai dao, te homu kolesaga meni yai bidigo olo po naga dao.
*

21 Magi baso meni, God aga homu kolesaga te wiegi yai mu, aga tigidali naide kuna konebo kolesaga sia pai elalubo dao. Tama agai te tiwai ilama tama we bidi augwaligo augwa homu kolesagago naga aga konesiabo sē ilali. Tialima Godigo homugo te dago Kraide pusubo pogo agai te po augwa homugo konealubo we bidi agai ma dobola saibao. T̄de we bidi augwaligo te pode te homu kolesaga meni yai bidigo olo po naga dao homu yali, tiali goli Godigo homugo te pogo agai we bidi ma saibao.

22-23 Te Juda bage augwaligo te po wabo dao, “Te ola mabo pode, te dago gedugo te nago te bidigo isābo genuai bomai sē ebo subaso da, teda

* **1:19:** Ais 29:14 * **1:20:** Jop 12:17; Ais 19:12; 33:18; 44:25

dago te nago ola mabo po te mu po dao homu yaibao.” Tiali goli eno “Te Kraisi aga te ni pedaide isali kolesaga te genuai se dao,” te po eno te Juda dabebolo obaso, augwaligo te po hagela eyu oda tagalobo dao. Me ma, te Juda hani isawai bage augwaligo homugo bidi mego aga digi homu kolesagago naga augwalibolo augwa e tode bidibo kolesaga page hania ola mao, te homu augwaligo ebo dao. Tama tiali goli dago te Kraisi ni pedaide isali po augwalibolo ola mobaso, hagela homu eyu te pode augwaligo me te homu kolesaga meni yai olo po naga dao, te homu ebo dao.

²⁴ Tiali goli te da Godigo i olama dia sali we bidi, da me badu Juda bage, me badu te Juda hani isawai bage, dago homu te Kraisi de pusubo pogo te Godigo genuai bomo dali aga wiegi yai homu kolesaga me te hania ola mabo dao.

²⁵ Magi baso meni, bidigo gedude te Godigo yali homu kolesaga te page meni yai homu kolesaga dao. Tiali goli agai homu kolesaga wiegi yai mu dao, tego te tode bidigo homu kolesaga tigidali aiyaba elalubo dao. Tama bidigo gedude Godigo yali se, te bomo meni yai se dao. Tiali goli te mu meni, agai genuai bomogo te tode we bidigo bomu tigidali aiyaba elalubo dao.

²⁶ Eno ama dede, kone palao. Te Godigo dage i wali sogo te dage magi we bidi dabe bidaliwe? Te tode bidigo gedude dage tomode te haniani naide bugagia koneani bidi hauwa meni, te gasa we bidi tonalubo bomu elalubo bidi hauwa meni, te genuai nogi yai bidi dage tomode hauwa menio.

²⁷ Te meni. God agai homugo eyu tama te

tode haniani naide kuna koneani we bidi hale emainogo eyu, agai te augwaligo gedude te homu kolesaga meni yai bage dia sali. Tama me te tode genuai bomo elalubo bage hale emainogo eyu, agai te tode we bidigo gedude bomo meni yai we bidi dia sali.

²⁸ Te tode we bidi augwaligo gasa we bidi me badude e homu ebo dao, "Woo, augwali te nogi meni yai bage naga dao, dwai bage dao, augwali olo nai naga dao," te homu ebo dao. Tiali goli agai te tode we bidigo gedude genuai wiegi yai nai dolomainogo eyu, Godigo te tobage olo we bidi dia sai dao.

²⁹ Tama tibaso, dago hania koneani, te bidi me deligo aga digi nogi Godigo gedude ugwaba me sogobeo.

³⁰ Tiali goli Godigo dage Krai Jisas dali wadolali, te agai tilama tama Krai go da wiegi yai homu kolesaga elalubo we bidi nigali. Te Krai de God agai da agai wiegi yai we bidi hani mu ilali, tama dago dwai se de sali se ge sela sanama tama da olo bugagia bidibao.

³¹ Tama tibaso, te dago te Godigo po bukude elalubo po me deli tiwai inao. Tede e tiwai po wai dao, "Bidi me deligo te nogi ugwaba sabo po wabo homu eyu da, teda agai dago Genuai Bidigo nogi naga ugwaba sao," te po aseani. *

2

Polgo te Korin dabego konealubo po da omainu te ni pedaide po page pusali

* **1:31:** Jer 9:24

¹ Tama eno ama dedeo, polobadu hasia ena dageba asama, tama eno Godigo geme dualali mu po te dagebolo pusagasali, tiali goli eno te haniani pogo te dage homu begelemainogo me wabeo. Tama eno te koneani genuai genuai kolesagade te po dagebolo me pusubeo.

² Te eno homugo digi eno tiwai po walio: te ena dage tomode bidibo sogo, te eno homugo gasa nai me konebo se me ebeo. Menio. Eno homugo te Jisas Kraisba naga konealumainogo yaibao. Awe, te Jisas Kraisi ni pedaide isai dao, tede naga eno dagebolo po pusabo homu yai.

³ Tama polobadu ena dage dali bidali sogo, te sogo ena bomo meni yani. Eno moni wi elalu, tama ena tigi didibili hauwa yai.

⁴ Tama eno ola mani po me, te dagebolo pusali po me, te eno te kolesaga koneai bidigo kolesaga selama, te dagego homu bega sabo po me wabe. Menio. Dagego te Tedali Mobo Bidigo bomu kuna konemainogo eyu, eno Godigo po dagebolo ola mayu wai dao.

⁵ Eno tama tiali. Magi baso meni, eno homugo te bidigo homu kolesagaba te dagego homu teba tialugobeo. Menio. Eno homugo te dagego Godigo bomode naga te Kraisinde konealubo po daŋ weyu, tama teba naga duga homu bugagia tialuaibao. Tama tibaso, eno te Kraisgo po dagebolo pusuyu, eno te kolesaga koneai bidigo po wabo kolesaga wali pabeo, eno te tobage homu bega sabo pogo te Kraisgo po dagebolo pusubeo.

Godigo Tedali Mobogo te kuna koneabo kolesaga dabolo mani

⁶ Te t̄de kolesaga koneai bidi dabego kolesaga eno dagebolo ola masīwani goli, te Godigo Mobo Bidigo te Godide ola mabo po page kuna konebo usu yali we bidi augwalibolo eno te koneani kolesaga po pusubo dao. Tiali goli te t̄de bidi dabego koneani kolesaga po me wabo meni. Tama te t̄de tobolu bidi dabego kolesaga me dago wabo meni, te augwaligo bomo kimi megi meni ebo.

⁷ Tiali goli dago te Godigo koneani kolesaga po pusubo dao. Te po te bidi dabego koneidali weyu geme dualaluali. Godigo te t̄ dagalu nigisībadi tama agai te koneani kolesaga sa muani te dabolo mayu, tama te koneani kolesagago dago te Godigo bomai ula digi nosali selama tama bugagia bidimainu yalio. Tama te tobage koneani kolesaga po dago te we bidibolo ola mabo da.

⁸ Te e t̄de tobolu bidi deli mego te koneani kolesaga po page me konebeo. Menio. Te augwaligo konegi sogo da, teda augwaligo te ula yai bomo elalubo Genuai Bidi me sisinama, tama aga te ni pedaide elama me isigi meni dao.

⁹ Tiali goli dago te s̄ dabe po wabo te Godigo po bukude wali po gilama yali,
 "Te we bidigo gedugo susīwani nai, tama odogo me odobe, tama bidigo homuba me pedalisīwai,
 te
 nai digi Godigo sisi ilali te we bidi dabe augwaligo
 aga godolo mu ebo bage augwalibolo momain-
 ogo

yai.” *

¹⁰ Tiali goli te polobadu geme dualaluali po te Tedali Mobo Bidigo sède te Godigo dabolo ola mani. Tedali Mobo Bidigo te tigidali nai osola suyu tama koneani. Tama te Godigo homu kolesagade aga geme dualali nosali sę yabo homu, te me te Mobo Bidigo konebo dao.

¹¹ Mena bidigo te gasa bidi mego homu kone-gowe? Menio. Te bidi aga mobogo digi, te aga tomode bidibo, tego naga koneani. Te tiwai naga, te gasa bidi me deligo te Godigo homu kolesaga me konesiawai. Te Godigo Mobogo digi agai naga konebo dao.

¹² Tama dago e tðde we bidi tonalubo mobo me sabeo. Menio. Dago te Godidu asali Mobo Bidi sali, tama dago te Godigo dabolo olo maiabo tigidali nai konemainogo yalio.

¹³ Tama tibaso, dago te Godigo Tedali Mobo Bidi elalubo we bidibolo te Godigo olo maiabo naide po hanilama pusubadi, dago te bidigo homude selama dago te po me wabo meni. Menio. Te Tedali Mobogo digi da ola menama, tama dago te po ola mabo dao.

¹⁴ Tiali goli te Tedali Mobo Bidi elalusiabo bidi da, agai te Godigo Mobogo olo mabo nai dabe sogobeo, aga usu egobeo. Magi baso meni, agai homugo te page meni yai nai dao, tama agai te naide te page bugagia konegobeo. Te naide po dago te Tedali Mobo Bidide naga sali, tama te Tedali Mobo Bidi meni yani bidi da, agai te po page me dagalogobeo.

* **2:9:** Ais 64:4

¹⁵ Tialima, te Tedali Mobo elalubo bidigo, agai te tigidali nai dagalama, tama te nai page konebo usu ebo dao. Tiali goli te bidi me deligo te Tedali Mobo elalubo bidi dagalainogo ebo te usu me egobeo.

¹⁶ Awe, te Godigo po bukude po me elalubo e tiwai wabo,
 “Dego te Genuai Bidigo homu konebaso, te agai Genuai Bidi mobo mabo usu egowe? Bidi meni,”
 te
 aseñani po tama wabo. Tiali goli te Kraisgo homu kolesaga dago elalubo dao. *

3

Godigo po pusubo bidi da te Godigo se ebo bidi dao

¹ Tama tialima, ama dedeo, polobadu eno digi dagebolo mani po te eno dagebolo te Tedali Mobo Bidi elalubo bidi dabebolo mani po tiwai gilama me mabeo. Usubeo. Menio. Eno dagebolo mani po te eno te poloba homu elalubo bidi dabebolo mabo po tiwai mani. Te sogo dage te Kraisgo kolesagade kuna konesiayu tama te wai boꝝ tiwai bidibadi tiwai dao.

² Eno po digi po begelama obao. Dage te Krai wali pabo kolesagade wai boꝝ tiwai bidibaso, te eno po dagebolo ola mobadi, eno te yadala pai po naga dage ola mani, te wai boꝝ ame pe mabo tiwai. Eno te dili yai nai dage mabeo. Te sogo dagego te dila pai nai tuabo aꝝ isawai, dagego

* **2:16:** Ais 40:13

Godigo seḡe yai po sabo usube. Megi me dage usu yabo me elalubao. *

³ Magi baso meni, dage te poloba meda yai homu kolesagade me bididubao. Awe, te ama hasi dali dwai homu eyu tama konila po wabo homu kolesaga te dagede me elalubao. Tama te kolesaga dagego me idubo, te poloba dobo homu kolesaga ebao. Te tama tebo kolesaga te tḡde bidigo ebo kolesaga naga dao.

⁴ Dage tomode bidi me badu deli deligo te po wabo, “Ena Pol wali pabo dao.” Tama gasa bidi me badu deli deligo te po wabo, “Ena da te Apolos wali pabo bidi dao,” te po wabo. Te tiwai kolesaga ebaso, dago koneani, te dage tḡde bidi tiwai me bidibao.

⁵ Dagego bugagia homu kone palao. Apolos wali te de dawe? Ena Pol, ena de dawe? Da si da te seḡe bidi naga bidibao. Genuai Bidigo gasa gasa seḡe da sibolo mawai, tama da sigo te yali seḡe dagego konealubo po te Kraide daḡ wali.

⁶ Eno da te nai wai bulali. Te Apolosgo te nai wai bulali madi pageba weḡ gegeli pali. Tiali goli God agai te nai pua pai holomainu iliduali.

⁷ Tama te nai wai bulali bidi, agai nogi te meni yaibao. Tama te weḡ mabo bidi, agai nogi me te elalugobeo. Magigo menio. Godigo te nai holomainu ilidubao, agaduba deligo genuai nogi naga elalubo dao.

⁸ Tama te nai wai bulubo bidi me, te nai waiba weḡ mabo bidi, te augwali sigo seḡe te deli tigi poai naga yali. Tama augwali si deli deligo te augwa

* **3:2:** Hib 5:12-13

si yali sę usu nama, te Godigo augwalibolo mabo dwagi yai nai saibao.

⁹ Magi baso meni, da si te Godigo deli sę naga ebo sę bidi dao, tama dage te Godigo gi tiwai dao.

Te Godigo we bidibolo po pusubo sę bidi te kamda sę ebo bidi tiwai

Tama dage te Godigo be tiwai, aga te be sędu bidibao.

¹⁰ Te God aga olo da tau sali wiegi yai kole-sagade ena te Godigo po pusubo sęde te polalubo tobolu bidi te kolesaga koneai kamda bidi tiwai pedalali, tama eno te be pos ni bulalio. Tama gasa bidigo te pos ni daide ugwadu te be sę ebao. Tama tigidali bidi augwali deli deli dua bugagia koneama tama te pos ni daide be sę yao.

¹¹ Dagego koneani, te be pos ni mu bulai elalubao, te Jisas Krais naga dao. Tama niwai bidi me deligo agai te gasa pos ni me bulainu ebo te usu me egobeo.

¹² Tama te pos ni daide ugwadu be sę yainu ebo bidi augwali deli deligo haniani naigo te be sę yaibao. Bidi me deligo te wiegi yai kapa nogi gol tego te be sę yaibao. Bidi mego te kapa nogi silvago ma te dila pai masigi mugo, me te nigo, ma te kalago, ma te gasagi yai nosai dili dabego te be sę yaibao.

¹³ Te magi naigo te be sę yainu homu ebaso da, teda te tigidali bidigo sę yali te nosali po tų ebo sogo te hania haninama pedalaibao. Tama te po tų ebo side te sia dabo posolo ebo tiwai pedalaibao. Tama te sia aga digi te tigidali bidi deli deligo yali sę usu sesa pelama, tama

augwaligo yali se te wiegi yai yaliwe ma meniwe, te augwaligo koneaibao.

¹⁴ Te bidi deligo be te pos ni daide se ebaso, tama agai te be siago disiqbaso da, teda te se bidibolo Godigo dwagi yai nai mawaibao.

¹⁵ Tiali goli te se bidi me deligo be te tigidali siago dobaso da, teda te bidigo yali tigidali se te hagawaibao. Tialima te se bidi aga digi te bugagia bidaibao, tiali goli te bidi siago dabo be buluba wi paligo te sana pali bidi tiwai bidaibao.

Dage te Godigo wiegi yai be dao

¹⁶ Dage da te Godigo wiegi yai lotu be tiwai dao, tama te Godigo Tedali Mobo Bidi te dage tomode bidibao, bidi aga bede bidibo tiwai bidibao. Tama te dagego me konebewe?

¹⁷ Te bidi deligo Godigo te wiegi yai lotu be elalubo te dolobaso da, teda Godigo te bidi dolaibao. Magi baso meni, te Godigo be te tedali gasagi yai mu elalubo, te Godigo be naga dao. Te dage tama dao.

¹⁸ Tiyu te bidi me deli agade digi tibo po ola mayabuo. Te dage tomode bidi deli agai te e tode homu kolesaga wali peyu tama te tiwai homu eyu, 'Eno kolesaga koneai elalubo,' aga te homu eyu da, teda aga hasia bolo aga te tode we bidigo gedude te wabo pabo bidi tiwai pedalao. Tama tiyu aga te Godigo gedude te kolesaga koneai bidi mu pedalaibao.

¹⁹ Magi baso meni, te e tode koneani kolesaga te Godigo gedude te wabo pabo bidigo kolesaga tiwai ebao. Tede te Godigo po bukude te e tama tiwai po wai:

“God agai tilama tama augwaligo kolesaga koneanigo te augwa digi tibo haniani kolesaga koneai bidi dabe sali, te bidigo ba munama te kebi sabo tiwai gilama ebo dao.” *

²⁰ Tama tede te bukude te tiwai po me wali: “Genuai Bidigo koneani, te kolesaga koneai bidi dabego homu kolesaga te du walisiabo olo nai tiwai ebo dao.”*

²¹ Tama tibaso, te dage tomode te bidi me deligo te da Godigo po pusubo bidigo nogi ugwaba sabuo. Suao, te tigidali nai duga nai dao.

²² Ena Pol, me Apolos, me Pita, da te dage tau sabo se ebo bidi dabe da. E tode elalubo nai tigidali me, tego dage aiyaba elaluama tonaluabo nai meni, dagego te nai tigidali aiyaba elaluama tonaluabo bage dao. Te tode bidibo sogo me, te isibo kolesaga me, te megi elalubo sogo me, te nosali pedalabo sogo me, te tigidali te dagego nai dao.

²³ Tama dage te Kraiss dologode bidiyu dage agai we bidi hani dao. Tama Kraiss aga digi God dologode bidiyu aga Godigo bidi dao.

4

Genuai Bidigo digi aga se bidi dagalaibao

¹ Dagego te ena Pol dali, Apolos dali, Pita dali te dade dagego homugo kone paluyu tama koneao, da te Kraissgo se ebo bidi dabe tama Godigo te geme dualalubo po pusuyu tonalubo bidi dabe dao.

* 3:19: Jop 5:13 * 3:20: Tib 94:11

² Tama te sę tonalubo sęde te tiwai bomai po elalubao: te sę ebo bidigo te sę idubadi aga te agabolo te sę mani bidi dali homugo keę pai bidi bidao.

³ Tiali goli te dage, ma te bidi me deligo po tuęo te eno te sę ebo kolesaga dagalainogo da, teda eno homugo te magigo meni. Magi baso meni. Ena digi me te ena sę ebo kolesaga te me dagalabo menio. Tiali goli te usu dao, po meni.

⁴ Mu tama, te Godigo enabolo mani sę ebode eno homugo eno te sęde sęę pabeo, bugagia yai dao. Tiali goli te eno tama tiwai po wabo usu me egobe: "Ena doloba pai bidi da," te wagobeo. Te ena dagalobo sę ebo bidi te Genuai Bidigo sę naga dao.

⁵ Tama tibaso, te sogo me elalubadi, te dago Genuai Bidi asisębadi dagego te gasa bidi mego ebo kolesaga dagaligio. Aga asama tama agai te we bidi augwaligo augwa homu tomode geme dualalualali po tigidali selama te ulaba muaga-saibao. Tama tigidali bidigo homu kolesaga hania hanilaibao. Tama te sogo Godigo da tigidali deli deli bidi te dago yali sę osola sulama, tama te sę usu baso agai te sę yali bidigo nogi ugwaba saibao. Bidi deli deligo yali sę usu nama te aga nogi te tama naga ugwaba saibao.

⁶ Ama dedeo, eno homugo dage tau sabo homu elama, tama eno te ena dali Apolos da side te tamadi tama wali po wali. Dagego homugo da side homu koneama, tama te Godigo po bukude wali po tiwai gilama dolo wali peyu tama te po me boligio. Tama tiyu dagego hagoma eyu tama bidi me deligo nogi ugwaba siyu tama gasa bidi

mego nogi aiyaba munu me elalugio.

⁷ Abagi, magi yaliwe? Dego nage genuai bidi muai dawē? Tama nago mena nai te Godide sisawani nai elalubowe? Te mu tama nago te nai Godide saligo da, teda magi baso te nago naga nogi ugwaba siyu, te naga digi nage te nai page bidi da wainogo ebawe? Te hagoma ebo tagalao.

⁸ Awe, dagego homugo te dagego haliga paḡana palio! Dagego homugo te dage tigidali nai elalu tama dage usu yai elalubao. Te dagego da aiyaba elaluama, tama dage te gavman tuni bidi king tiwai pedalalio! Mu tama dawē? Woo, te duga homu naga dao. Eno homugo dage te tuni bidi king mu pedalomainao. Dage tama tigi sogo da, teda da me dage dali te tuni bidi dabego bomo elalugi da.

⁹ Magi baso meni, eno te homu yali: Godigo te da aga po sela pabo se bidi da te nosali badu mubo bidi tiwai ilama bidibao. Da te po tu yali bidi dabe da olama tama da isimainu emainao wai. Tama augwaligo da tigidali te ensel dabe me te tḡde bidi dabe dali augwaligo gedude da elainu homu yali, te tigidaligo da dali gisugu mawainogo yali.

¹⁰ Te Kraisgo nogi ugwaba sainu, da te tḡde we bidigo gedude te kolesaga geda muyu te polobo bidi tiwai bidibo dao, tiali goli dage te Kraisgo kolesagade te kolesaga koneai bidi tiwai bidibao. Dage bomai we bidi mu bidimainogo eyu tama dago dena digi bomo meni yai bidi dabe ilali. Dage genuai wiegi yai nogi elalubao, tiali goli dago nogi meni yanio.

¹¹ Polobadu me tama bidada asali te megi e

sogoba me usu nagasali, da Godigo po sela pabo bidi dabe, da nai sili bidiyu, tama dago dogoni me wa peyu ɔi nogone ebo, tama da badi ugwa naga elaluali. Augwaligo nogo tudi badu da eliyu ebo dao. Tama da bugagia dulalu bidabo pesage meni yai dao.

¹² Dago dena nogogo digi masigi dena tigi tau sabo se eyu dene mu ebo dao. Augwaligo dwai posobo po dabolo wabo, tiali goli dago augwali bugagia bidabo po naga augwaliba ponoyu ebo dao. Augwaligo dabolo dwai se eyu, te dene mabo kolesaga ebo, tama augwaligo te tiwai se eyu dago sula tagalama, te sege bugagia tolobo dao. *

¹³ Augwaligo po dwai mu da dali weyu ebo dao, tiali goli dago homu nagame ilibo po dua digi augwaliba weyu ebo dao. Da te tigidali to pedaide bidibo bagego gedude te dwai pobele bage tiwai mu gagawali. Da te tigidali bidigo gedude te nai ulubo genagide nai kagali te aigo sela sabo meda yai nai tiwai dao. Da te tiwai bidali, te megie e sogoba usu nagasu te tiwai me bidibao.

Te Korin we bidi augwaligo me te Polgo ebo kolesaga yao po wai

¹⁴ Te ena dali Apolos da si hobedagia bidibadi dage bugagia te po aseanigo te dage hale eyu dwai bidimainu homu me ebeo. Menio. Eno wai puluba tiwai dage eno dwagi yai homu eyu godolo ebaso, tama eno dage homu tau sabo po ola momainu obao.

* **4:12:** Tpi 18:3

15 Te mu tama dage te Kraisgo kolesagade te dage bugagia tonalubo bidi te bidi sese umabo te 10,000 bidi elaluyu da, tagalao, te dagego aya hauwa me elalubeo. Menio. Te da Krai Jisas dali wadolobo kolesagade enaduba deli ena te dagego aya tiwai bidibao. Dage eno te Kraisde wiegi yai gesi po pusama, tama dagego te po odolama tama Krai wali pabo gagalali. Tede te dage eno wai puluba pedalali.

16 Tama tibaso, eno dage te eno kolesagade usu selama bilimainu tama dage eno hodolobo te usu dao, ena da dagego aya tiwai dao.

17 Tama tibaso, te kolesagade naga eno te bidi Timoti dageba tagala palali. Aga te eno ogwa tiwai da, tama eno aga godolo mu eyu aga ena dali te homugo keꝓ pai bidi dao. Te agai dagego homu ma hodoliyu, te eno Kraisgo kolesagade wali pabo sunumi wali pomainu homu hodolaibao. Eno te tigidali bulude te Godigo po wali pabo we bidi hani tigidaliba te kolesaga naga ola mabo dao.

18 Te dage tomode bidi meba augwaligo homugo te ena dageba asogobe homu eyu, tama augwali hagoma ebao.

19 Tiali goli menio. Te Genuai Bidigo homu usu yali da, teda ena dage bidiboba polo asaibao. Tama eno te hagoma ebo bidi dabego wabo po naga konegobeo, te augwaligo te Godigo seꝓ yabo bomo me elalubowe ma meniwe, te me eno koneaibao.

20 Magi baso meni, te Godigo bidi deli tonalubo si, te bidigo ebo seꝓe naga dago God aga dali bidibo te konebo dao. Aga wabo pogo naga dago

konegobeo.

²¹ Dagego mena kolesaga godolo ebowe? Te dagego homugo eno te dage dodolabo dono wabi tolasa ena dageba asomainogowe? Ma, dagego homugo eno te dage dali dwagi yai homu eyu godolo ebo kolesaga me, te homu nagame ebo kolesaga elalubo te eno dageba sela asomainogo homu ebo dawe?

Te Godigo po wali pabo bagego te augwali tomode pedalubo dwai kolesaga dodolao po wali

5

(Daj 5-6)

Te dwai penani se te Korin bage tomode pedelali

¹ Te we sabo kolesaga togolama dolobo se te dage tomode mu tama elalubao, te po wabo eno me odali. Tama te we sabo togolama dolobo gasagi yai kolesaga me, te tobage kolesaga te Godigo po odisawani we bidigo me isabo dwai kolesaga dao. Te e tama tiwai: te dage tomode bidi me deligo aga ayago we sai. *

² Tama dage, dage me tama duga nogi ugwaba siyu hagoma idubawe? Te dagego tede hagoma ebo kolesaga tagalama, te dage homu dene eyu gela wagi sogo da, teda te usu igi mu da. Tama tiyu, te dagego te dwai penani kolesaga ebo bidi sela sanama, tama dage dali me bidimainu me elamu dao!

* **5:1:** Bom 22:30

³ Te enade, mu tama, te eno tigi te dagede digibulu elalubo, tiali goli te eno homude ena te dage dali bidibao. Tama ena da te ena dage dali mu bidibo tiwai aq ebo, tama eno te kolesaga ebo bidigo se te eno me dagala suai dao.

⁴ Eno te tiwai po wai dao: te Genuai Bidi Jisasgo nogide te dage deliba sisinama po miao. Tama eno homu me, te dago Genuai Bidi Jisasgo bomomo me te dage dali bidaibao.

⁵ Tama tiyu te bidi dagego te Satango nogoba munama, te agai te dwai se yali bidigo tigi dolomainao. Dago te tiwai elama, tama aga tigi dolai goli Godigo te bidigo mobo noma bidi te Genuai Bidi ma asobo side ma dobola somainogo tama tiao.

Te Korin bidi dabe augwaligo te dwai se ebo bidi sela sqmainu wai

⁶ Te dage tomode te bidi me deligo te dwai penani se idubao, tama dagego tede hagoma ebo kolesaga ebo, te dwali. Te aga dage dali me bididubadi, te aga te tubo nai bret bo dabo nai yis tiwai dao. Te dwasianu yisgo te tigidali bret bo domainu ilibo dao. Te dagego konesiyu ebawe?

⁷ Dage da te yis meni yai bret tiwai dao. Awe, te eno koneani. Tiali goli te dwai penani se ebo bidi dage tomode bididubadi aga te yis tiwai eyu, tama agai dwai se ebo kolesagago dage me dolaibao. Te Juda dabego Pasova nai tubo olo bidibo side, tede augwaligo te sipsip wai ela tuyu, tama te sogo me te bo disawai bret me tuai dao. Te tiwai me megite dago Pasova sipsip Kraisa aga isama te ofa mayu yai dao. Tama tibaso, dagego

te bidi buluba sayao, te dage te gesi bret, te yis meni yai bret tiwai ma pedalomainogo yao. *

⁸ Tama tilama, da dwagi yai homu eyu deliba sisinama tama dago Pasova nai tuinao. Tede eno po digi po begelama tama po page obao, dago tama tuyu dago te poloba yis dali tulamuo, te yis meni yai bret naga tuao. Te po page e dao: dago te dwai se yabo homu dali te dwai dwai se ebo kolesaga dali te si ilamuo. Meni. Dago homu mu naga eyu, tama mu po naga weyu yao. *

⁹ Te eno gasa me dagebolo asena tolali pasde eno e tama po wai: "Dagego te dwai penani se eyu we sabo kolesaga dolobo bidi dabe dali kisasa biligimio," te po asena tolali.

¹⁰ Eno te we sabo kolesaga doloyu ebo te Godigo po odisawani tigidali bidi dabe augwali te mu tagalao po weyu eno te po wabe. Te tode bidi dabe augwaligo Godigo po wali pisayu tama te mena nai pesa ebo bidi dabe me te gasa bidigo nai anoma elama sainu ebo bidi me, te tibo godiba lotu po wabo bidi dabe, te augwali mu tagalao olama eno te po me wabeo. Te dagego te dabe mu tagalabo homu egi sogo da, teda dagego te tigidali to mu taga pelama, tama gasaba bidigi pigi da.

¹¹ Tiali goli eno aseni po page te e tiwai dao: te bidi me deligo aga dage dali ama da wabo bidigo te we sabo kolesaga dolobo me, agai te gasa bidigo naide pesa eyu, me agai tibo godibolo lotu po weyu, me agai posobo po obaso me, ma agai bomai we tubaso, ma agai te gasa bidigo nai

* 5:7: Sai 12:5 * 5:8: Sai 13:7; Bom 16:3

anoma elama te tigidali kolesaga ebaso da, teda dagego aga dali kisasa biligio, aga dali abagi me wagio. Menio. Dagego te tiwai se ebo bidi dali te nai me munu me tulamo dao.

¹²⁻¹³ Te Godigo po odisama dago hani bulu badu bidibo we bidi dabe dagalobo se, te eno se dawe? Menio. Te God aga digi augwaligo kolesaga dagalaibao. Tiali goli te dage dali bidiyu Godigo po wali pabo we bidi hani tomode elalubo bage, te augwali dagalobo se, te dagego yabo se dao. Tede te Godigo po bukude po me deli elalubao, te po dago wali pinao, te po e dao: "Dagego te dage tomode bidibo te dwai bidi buluba mu sela sayao." *

6

Te Godigo po wali pabo we bidigo te augwa ama po tu ela magio wali

¹ Te dage tomode bidi me deligo po te gasa bidi me dali elalubaso da, te agai te Godigo we bidi bolama tama te Godigo po odisawani jas bidi dabe gesabidide te po tu egi pogowe? Ya! Agai te tebo kolesagade te aga hale meni yaibawe?

² Da Godigo we bidi te dago te tigidali tode bidigo kolesaga nosali dagalainu yaibao, te dagego konesiamawe? Mu tama, te dagego te tigidali tode bidigo kolesaga dagalaibao. Tama magi egowe? Te dagego duga hasi te tobage dwasianu po naga dagalobo te usu meniwe?

³ Te dago te mobo bidi ensel dabego kolesaga me nosali dagalaibao, te me dagego konebewe?

* 5:12-13: Bom 13:5; 17:7

Mu tama, te dago augwaligo kolesaga te dagaibao. Tama tibaso, dago te tōde dwasianu nai dabe po dagalobaso te usu mu yaibao.

⁴ Tama tialigo da, teda dagego e tōde naide po elalubaso da, magi baso dagego te po dagalobo sē te Godigo po odisāma te dago gedude nogi meni yani bidiba mobawe?

⁵ Eno te po wabode dage bugagia bidimainu obao, te dagego te tiwai ebo kolesagade te dage hale yao! Magi baso meni. Te dage tomode te ama name si tomode pedalobo po dagalabo te kolesaga koneai bidi me deli naga meni ebawe?

⁶ Tiali goli dagego te tiwai ebo meni. Te po pagede naga te ama me deligo te gasa ama me te po tū ela mayu, tama te Kraide konealubo po daḡ wasiḡwani bidi dabe gedude te po tū ilibo da. Te dwali.

⁷ Awe, dagego duga hasi te ama dabe po tū ilibo, tama te kolesagade digi te dage tulalu-alio. Magi baso augwaligo te dwai sē dagebolo emainu gogolobewe? Magi baso te augwaligo dagego doado bage anoma elama somainogo gogolobewe? Dagego te tiwai egi sogo da, teda tebogo dagego te Godigo po odisḡwani bidigo gedude po tū ebo kolesaga aiyaba elalugi da.

⁸ Tiali goli menio. Duga digi te meba bidi dabe dali dwai sē elama, tama augwaligo doado bage anoma elama sali! Awe, dagego te tiwai dwai kolesaga te duga ama dabe mu dali ebo dao.

⁹ Te dwai kolesaga ebo bidi dabe, augwali te augwali Godigo te we bidi tonalubo bomo tomoba me pogobeo. Te dagego konebewe? Tiyu dagego te duga homuba digi tibo po ola maiabuo.

Te penani sę kolesaga ebo bidi dabe me, tama te tibo god wali pabo bidi dabe me, te we sabo kolesaga dolobo bidi dabe badi, tama te we dali ebo kolesaga tiwai eyu godolo ebo bidi dabe me, tama te hale ebo kolesaga te gasa bidi dabe dali ebo bidi dabe me,

¹⁰ tama te nai wi sabo bidi dabe tama te gasa bidi dabego doado bagede pesa homu ebo bidi dabe me, tama te bomai wę tubo bidi me, tama te gasa bidi dali posobo po wabo bidi dabe me, tama te gasa bidi dabego doado bage anoma elama sabo bidi dabe me, te tobage kolesaga ebo bidi dabe tigidali te augwali Godigo we bidi bugagia tonalubo bomo tomoba pabo usu me egobeo.

¹¹ Tama polobadu dage meba te tiwai sę ebo we bidi dabe bidaluali. Tiali goli dagego te dwai sę ebo tagalama, tama baptais salio. Godigo dage aga da olama sa muai. Dagego te doloba pai nogi salio. Te Genuai Bidi Jisas Kraiss me te Godigo Tedali Mobo augwali sigo sę eyu, tama dage Godigo gedude doloba pai we bidi hani tama pedalai dao.

Te dago tigigo ebo kolesaga ebogo te God nogi ugwaba sao

¹² Dage tomode te bidi me deligo e tiwai homu ebo dao, 'Te tigidali sę eno ebo da te usu egi da.' Awe, mu tama. Tiali goli te tigidali sę ebogo ena tau me sogobe. Tigidali kolesaga eno yabo usu da yaibao. Tiali goli eno te kolesaga me deli ebogo te ena tonalumainu me gogologobeo.

¹³ Gasa bidigo eno po aiyaba elalumainu eyu e tiwai po waibao, “Tubo nai te tabigo sabo nai da, tama tabigo te nai sabo dao.” Agai homu te tiwai me aga tigigo te dwai penani se ebo te me usu dao, te aga tigigo yabo se dao. Awe, agai te tubo nai dali te tabi dali side wali po te mu dao. Tiali goli Godigo te si dali nosali silaibao. Tiali goli dago tigigo te penani kolesaga yabo nai meni. Menio. Dago tigi da te dago Genuai Bidigo nai dao. Tama Genuai Bidi te tigi tau sabo nai dabolo mabo dao.

¹⁴ Tama tiyu, God aga bomogo digi te dago Genuai Bidi te gu pagede hodolali, tama te tiwai dago tigi tau siyu agai da me hodolaibao.

¹⁵ Te dage deli deligo tigi te Kraisgo tigi nogo saqa tiwai elalubo, te dagego me konebewe? Tama eno te Kraisgo tigi pedai me badu dagala selama, tama penani eyu, te genuai tudu bilibo wego tigiba munama elalumainu homu egowe? Munu me tegobeo. Mu menio!

¹⁶ Te penani se ebo we dali kisa sali bidi, te aga dali te tigi deli aga dali yali, te dagego konebewe? Godigo po bukude te tiwai po olama hania wali, “Te bidi dali aga we dali augwali si tigi deli naga pedalali,” te po aseani. *

¹⁷ Tiali goli te Genuai Bidi dali kea sali bidi da, agai homu mobo bidi te aga dali deli elalubo dao.

¹⁸ Dage te penani kolesaga idali weyu te boi bidi tiwai wi pao! Te tigidali dwai se te bidigo ebo, te tigi bulu badu ebo dao. Tiali goli te penani se kolesaga ebo bidi, agai aga tigi aga digi dolobo dao.

* **6:16:** Gag 2:24

19 Te dagego tigi da, te homude Godigo Tedali Wiegi Yai Mobogo be elalubao, te dagego konebewe? Godigo te Tedali Wiegi Yai Mobo te dagebolo manio, tama te Mobo dage tomode bidibao. Dage te dugade digi me elalubo meni. *

20 Menio. Godigo te genuai naigo mu dage ma abelalio. Tama tibaso, penani se isayu, te dagego tigigo te dagego Godigo nogi ugwaba sabo kolesaga naga yao.

Polgo te we sabo kolesagade po wali

7

(Daj 7)

Polgo te we sabo kolesagade ola mabo po wai

1 Megi da eno dagego enaba tolali pasde aseani po wei ponainogo homu ebao. Eno homugo te bidigo te we dwasianu me nogogo diasiabaso da, te wiegi yai dao.

2 Tiali goli te haniani penani ebo kolesaga te tde elalubao. Tama dagego te kolesaga idali weyu, te tigidali bidi deli deligo te augwa we sao, tama tigidali we dabe deli deligo me te augwali sali bidi dali bidao. Te bidigo tigi te aga wego da, tama bidigo me gea siyu tama dau munu me olamuo. Te tiwai naga, wego tigi te aga bidigo da, tama wego me gea siyu tama dau munu me olamo dao.

3 (-)

4 Magi baso meni. Te wego aga tigi me tonalugobeo. Menio. Te aga bidigo tonalubao.

* 6:19: 1 Ko 3:16; 2 Ko 6:16

Tama te tiwai naga, te bidigo aga tigi gea selama daꝝ weyu munu me tonalugobeo. Menio. Te aga wego tonalubao.

⁵ Dage we de bidi si taluama bidibo, te me deligo me tudiba muyu tama aga tigi daꝝ weyu gea siyu me elamuo. Te kolesaga ebo tagalao. Mu tama, duga si homu deliba munama, tama duga si tigi te pewardage sogo habu selabo homu elama, te duga si Godibolo gedu haluasa po wabo se yainu osogo habu selabo homu ebaso da, te usu da. Tiali goli nosali te duga si homu deli elama te duga si tigi deliba ma taluao. Tiyu duga digi te duga tigi ma tonaluabo usu isaꝝu, tama Satango dage usu siyu, te dagego dwai penani se emainogo sinabuo.

⁶ Te e we sabode wabo po, te dagego enabolo hanalu obaso tama eno te usu da wai. Tiali goli te eno dagego we sao po weyu te bomai po tiwai me ebeo.

⁷ Te eno homugo tigidali we bidi te ena digi tiwai bidimainu homu ebo dao. Tiali goli eno koneani, te Godigo tigidali bidi deli delibolo te haniani se yabo kolesaga mani. Te me deligo te gasa tobage me tiwai tedali siyu, te gasa mego te gasa tiwai tedali sali.

⁸ Tiali goli te we sisawai bidi me, te bidigo sisawai we badi, tama te augwa bidi dabe isai we dabebolo me, te augwalibolo eno te tiwai po obao: te augwali ena tiwai bidibaso da, te wiegi yai dao. Ena da te we sisayu enaduba bidibo bidi dao.

⁹ Tiali goli, te augwaligo homu me tigi te augwa digi bugagia tonaluabo homu usu yabo

ąq isąbaso da, te augwa sao. Te augwali we sobaso da, te wiegi yai da. Tiyu augwaligo homu hogodaluyu tama dwai sę ebo homu yabuo.

¹⁰ Te we sali bidi me, te bidigo sali we te augwalibolo eno te bomai po mobao. Te eno digi eno bomai po me wabeo. Menio. Te dago Genuai Bidigo polobadu mani bomai po dao. Te e tiwai elalubao: te wego aga bidi me taga pelamuo wali.

¹¹ Te aga bidi tagalai baso da, te aga olo bidimainao. Te meni baso da, te aga ma begasa pelama, tama aga bidi dali deli homu elama bidigi pao. Tama bidigo me te aga we munu me sela sęgio. *

¹² Tama dage tomode gasa bidi dabe augwalibolo te ena digi eno naga te po obao, te dago Genuai Bidigo wali po meni. Eno e tiwai po obao: te ama me deligo we sali tama te wego te Kraisde konealubo po dąq wasiąbaso, tama te we aga dali bidainogo homu ebaso da, te amago te aga me sela sęgio.

¹³ Ma, we me deli selama tama te we aga bidigo te Kraisde konealubo po dąq wasiąbaso, tama te bidi te we dali bidabo homu ebaso da, teda te wego aga te bidi me taga pelamu dao.

¹⁴ Magi baso meni. Te konealubo po dąq wasiąwani bidigo te aga we dali mu keą pelama bidiyu, tama tebogo te aga te Godigo gedude te dwagi yai bidi ilaibao. Te tiwai naga te Kraisde konealubo po dąq wasiąwani wego te aga bidi dali mu keą pelama bidiyu, tama tebogo te we aga te Godigo gedude te dwagi yai we ilaibao.

* **7:11:** Mat 5:32; 19:9; Mak 10:11-12; Luk 16:18

Te meni yani da, teda dagego wai puluba dabe te augwali dwagi yai me egobeo. Tiali goli megì te augwali Godigo gedude wiegi yai elama mu bidalubao.

¹⁵ Tiali goli, te konealubo po daꝝ wasiꝝwani bidi agai te aga Kraide konealubo po daꝝ wali we tagalabo homu ebaso da, te usu da, agai tagalomainao. Te tiwai kolesaga pedaliyu, te duga ama ma abe aga te kalabus tiwai me elalugobeo. Magi baso meni. Godigo dage i olama, te wiegi yai homu nagame ebo kolesaga wali pomainu ebo dao.

¹⁶ We, nago te naga bidi tau selama, te aga Godigo po wali pabo bidi pedelabo, ma meniabo, te nago konebeo. Te nage bidi, te nago naga we tau sobaso tama aga te Godigo po wali pabo we pedelabo, ma te meniabo me, te nago konebeo dao.

Te Godigo dabolo doba yali kolesagade te da bidaluao

¹⁷ Tiali goli dago Genuai Bidigo te deli deli bidibolo dobaba pali se eyu, tama aga te se eyu bidibadi te Godigo aga i obaso da, teda aga te se de naga bilao. Eno te tiwai bomai po te tigidali Godigo po wali pabo we bidi hanibolo bomonama ola mabo dao.

¹⁸ Te po page e tiwai dao. Te bidi me deli te Juda dabe augwaligo aga tigiwali sa muyu tama togolama tama te tiwai bidibadi Godigo aga i waliwe? Teda, agai te aga tigiwali togwali te ma dodolabo homu egio, te tagala. Te gasa bidi me deli aga tigiwali togosiꝝwai bidibadi te Godigo aga i waliwe? Teda, agai tigiwali megì togogio.

19 Te tigiwali togobo kolesaga, te Godigo gedude te olo nai tiwai dao. Tama te tigiwali togosiabo kolesaga me te aga gedude te olo nai tiwai dao. Tiali goli te Godigo bomai po wali pabo kolesaga, te mu nai dao, te sege dao, tede magigo meni wagimio.

20 Te bidi te se me delide bidibadi tama Godigo aga i obaso da, teda aga te se de me bididua.

21 Te e tiwai dao. Te nage masigi sisabo olo se ebo bidi bidibadi tama Godigo nage i waliwe? Teda, tagala, magigo menio. Tiali goli, nago te masigi sisabo olo se ebo tagalabo sunumi elalubaso da, teda nago te sunumi wali pao.

22 Tiali goli te olo mu se ebo bidi bidibadi tama Godigo aga i wali, megi da te aga dago Genuai Bidigo selama, tama te Genuai Bidigo gedude te aga olo se ebo bidi me bidigobeo, te aga olo naga bidibao. Te tiwai naga, te olo wiegi yai bidali bidi, te olo se me isabadi tama Genuai Bidigo aga i wali, megi da aga te Kraide masigi sisabo olo se ebo bidi tiwai pedalama bidibao.

23 Te Godigo te genuai naigo mu dage ma abelalio. Tama tibaso, dage te bidi dabede te masigi sisabo olo se ebo bidi tiwai me ped-aligimio, te bidi dabego olo nigibo bomo yai po dologoba bidigi pigimio.

24 Te ama dedeo, te dage deli deli te niwai se bidi bidibadi tama Godigo aga i obaso, aga te se de naga te God dali deli homu eyu tama bidimainao.

Polgo te we sisawai bidi me te bidigo sisawai we augwalide wali po

²⁵ Te bidigo sisawai we te augwalide po tama, eno te dago Genuai Bidigo bomai po me elalubo meni, tiali goli eno te ena homude po pusubao. Te Godigo olo tau sabo wiegi yai kolesaga enade elama, tama agai ena te homu mu naga ebo bidi ilali, tama dage enaba duga homugo tialubo te usu dao.

²⁶ Eno homugo e tiwai kolesaga ebo te wiegi yai da wai: te megi tama sogo te genuai sege dali dene dali si te daba pedalubao, gasa bidi dabego nogogo. Tama tibaso, dage tigidali deli deli te megi bidibo tiwai gilama te tama bidalua, te eno homu dao.

²⁷ Te nago we sai dawewe? Tialima, te nago aga tagalabo sunumi gegebo se me egio. Te nago we sabe dawewe? Teda, nago te we sabo homu ma elamuo.

²⁸ Tiali goli, te nago we siyu da, te dwai se meni. Tama te gesi wegi te bidigo siyu da, te wegi agai te dwai se me ebeo. Tiali goli te we sali bidi me te bidigo sali we te augwali sege meba te tode elaluaibao, tama eno homugo te tobage se dageba pedalidali homu eyu eno e po obao, te dage megi bidibo tiwai gilama te tama bidalua.

²⁹ Ama dedeo, eno te megi wali po te page e dao: te to dali dagalu si silabo bodolu megi da pewadage ebao. Tama tibaso, te bodolu sogo elalubadi, te tode elalubo naide naga dago homugo kone pelamuo. Te we elalubo bidi dabe te augwali te we meni yai bidi dabe bidibo tiwai bidao.

³⁰ Tama te homu dene eyu gela wabo bidi dabe, augwali te gela wasiabo bidi dabe tiwai bidalua.

Te wiegi yai homu pemene ebo bidi dabe, te augwali wiegi yai homu pemene isaḅo bidi dabe tiwai bidao. Tama te doado bage abelebo bidi dabe, augwali te doado bage mu sisḅo bidi bidibo tiwai bidao.

³¹ Tama te tḅde doado bage sabo bisnis se ebo bidi dabe, augwali te e tḅde doado bage daḅ olalusiḅo bidi dabe tiwai bidao. Dago te tḅde elalubo nai dali kolesaga dali si tede naga dago homugo kone pelamuo. Dago koneani, te e megī elalubo tḅ silama tama hasegelama, tama te gasagi yai mu pedalaibao.

³² Tama tibaso, eno homugo te haniani naide te dagego moni homu isaḅu tama dage bugagia bidao. Te we sisḅawai bidigo, agai te dago Genuai Bidigo kolesagade te aga homugo kone palobo dao, te kolesaga aga bugagia wali pomainogo aga tama tebo dao. Agai te Genuai Bidigo homugo godolo yabo kolesaga yabo homu ebo dao.

³³ Tiali goli te we sali bidi, agai te tḅde doado bagede homugo kone palobo dao. Agai te aga wego godolo ebo kolesaga yabo homu ebo dao.

³⁴ Tama tiyu, agai homu kolesaga pebeda paibao. Tama bidigo sisḅawai we me, te gesi wegi me, agai te dago Genuai Bidigo kolesagade te agai homugo kone palobo dao. Aga homugo te aga tigi me te homu mobo bidi dali me te Godigo gedude bugagia wiegi yai mu bidimainu homu ebo dao. Tiali goli te bidigo sali we, agai te tḅde doado bagede homugo kone palobo dao. Agai te aga bidigo godolo ebo kolesaga yabo homu ebo dao.

³⁵ Eno te megī aseḅani po te dage tau selama dage bugagia bidimainogo wali. Te dage palibo

po me wabeo. Menio. Eno homugo te dage dolasa bidiyu, tama agade dagego homugo keꝓa peyu tama sesemane sogo te dago Genuai Bidigo se emainogo, te nai me deligo te dage homu kegabi sidali weyu te po wali.

³⁶ Te bidi me deli aga homugo agai te dolo meniabo kolesaga te aga noma sali gesi wegi te dali te tiwai kolesaga ebaso, tama agai homu te wede hodoloyu bomu mu eyu, tama agai suali te gasa sunumi me elalusiꝓbaso da, teda te bidigo te wegi keꝓmainao. Te seꝓe sabo se ebeo. Te augwa si bidimainao.

³⁷ Tiali goli, te bidi me deligo aga homude bomu eyu, tama te nai me deligo te aga selibo se me isiꝓbadi, tama aga homugo digi ebo tonaluyu, tama aga homude te po olama, te agai homugo te gesi wegi te augwaligo aga noma sali te aga olo mu bidimainogo ebaso da, te wiegi yai dao.

³⁸ Tama tibaso, bidigo te gesi wegi sabo, te agai wiegi yai kolesaga ebao. Tama te we sisꝓwai bidi, agai kolesaga te wiegi yai mu ebao.

³⁹ Te we me deligo bidi te aga bidi bidibadi, te we te aga bidi dali naga keꝓa pelama bidao. Tiali goli, te we aga bidi isibo si da, te we te bidi dali me keꝓalubeo. Te aga gasa bidi dali pabo homu ebaso da, teda aga te bidi dali pomainao. Tiali goli aga te Godigo po wali pabo bidi dali naga pao.

⁴⁰ Tiali goli ena digi eno homugo te tiwai homu yai: te bidi isai we aga olo bidainogo ebaso da, te aga wiegi yai homu pemene mu yaibao. Tama eno homugo te Godigo Tedali Mobo Bidi

te enade me bidiyu, tama agai ena te kolesagade agai homu ola mani.

Te Godigo po odobo we bidi dabe augwaligo te tibo god dabeba ofa ebo kibu mi dabe tueibawe ma tugobewe?

8

(Daj 8-10)

Te augwaligo tibo godibolo ofa mani kibu mi te augwaligo tugowe obaso Polgo te po wai

¹ Dagego te enabolo asena tolali pode, tede dagego e po me ena hanalu wali, “Te gasa we bidi augwaligo hasa ela munama, tama te tibo godibolo te ofa tiwai eyu, te hasa mi meba te tibo god pageba mubo dao. Tama da Godigo po wali pabo we bidi dago te tobage mi tubo te usu dawwe, ma meniwe?” te po dagego enabolo asena tolali. Te kolesaga ebode eno wabo po elalubao.

Dage mebago e po wabo dao, “Da tigidaligo koneani, te tibo god te olo nai dao.” Awe, te mu po dao. Tiali goli te olo konebo kolesagago te hagoma ebo kolesaga ebo homu hodolaibao. Tiali goli dago dena hasi te gasa we bidi dali wiegi yai homu eyu godolo ebo kolesaga selama, tama tebogo te da Godigo po wali pabo bomai we bidi pedalaibao.

² Te bidi me deligo agai te nai me deli mu koneani homu ebaso da, teda te bidigo koneani kolesaga sqa pali, te usu yabo me elalubao.

³ Tiali goli, te bidi me deligo aga God dali dwagi yai homu eyu godolo ebaso da, teda Godigo koneama, te bidi te Godigo bidi dao.

⁴ Te gasa we bidi augwaligo te tibo godiba ofa elama te mi dabe tubo kolesagade eno po megi obao. Dage mebago te tobage mi tuaio homu eyu tama dagego e po wabo dao, “Te tibo god te mu bidibo nai menio. Te olo piksa noma naga dao,” te po wabo. Awe, dago te po page koneani. Tama dage mebago e po me wabo dao, “Te god hauwa me elalubeo. Menio. Te God deli naga aga bidibao,” te wabo. Awe, te me dago koneani.

⁵ Mu tama, te gasa we bidi augwaligo te nogi “god” nogi ebo nai hauwa elalubao, tama te augwaligo hauwa naide nogi ilama, te “genuai bidi da” wai. Tama mu tama te “god” dabe, te dagalude, ma te tɔde bidigi sogo da,

⁶ tagalao, te dade dago God deli naga te elalubao, te God Aya dao. Aga te tigidali nai page bidi. Tama dago agai se emainogo eyu da aga wai mu bidibao. Tama te Genuai Bidi deli naga elalubao, te Jisas Krais da. Agai te tigidali nai nigali. Tama dago bidibo ula te agadu sai dao.

⁷ Tiali goli dage tomode te we bidi mebago te tibo godide te kolesaga kuna konebeo. Te mebago te polobadu te tibo godibolo mi ofa yali kolesaga hauwa sogo wali pedu geani. Tama megi me augwaligo homugo te gasa we bidigo te mi te tibo godiba ofa mu yali homu me ebo dao. Tama te homu ebadi augwaligo te tobage mi tubaso da, teda augwaligo homu tede sege sobao.

⁸ Tiali goli dagego te kolesagade e po wei ponobo dao, “Te nai tubo kolesagago da te God

pāba odasa me pogobeo. Te dago nai tusībaso, teda da te God gedude me s̄ā pogobeo. Me ma, te dago tubaso da, teda da te God gedude wiegi yai me pedalugobeo.”

⁹ Awe, te mu dao. Tiali goli dage mi tubo bage dage dua dao. Tiyu tama te tibo godibolo mani mi tubo s̄e duga digi elama, tama te bomo meni yai bidi dabego sulama, tede s̄āḡade dolama, tama augwali te dwai s̄ēḡeba tula muabuo.

¹⁰ Nage bidi te koneani kolesaga elalubao wida, te nage te tibo godigo lotu beba pelama, tama nage tede dulalu nai tueibao, tama bidi me deli te aga Kraide konealubo po dāu wabo kolesaga bomo meni yai bidi te agai nage subaso, te tebode te aga homu hodolama tama aga homu te mi tubo te dwai kolesaga da homu yali goli, te tibo godiba ofa yali nai tuabo homu yaibao, tama agai te mi tueibao.

¹¹ Tama tibaso, te nago koneani kolesagago te bomo is̄awani bidi dolali, te amade te Krai aga isama tama aga ma sai dao.

¹² Te ama mebago te Kraide konealubo po dāu wabo kolesaga te bomo me ebeo. Tama dagego te dwai s̄ē augwaliba elama, tama augwaligo te augwa gedude s̄ē ebo dwai ilibaso da, te kolesagade te dagego dwai s̄ē te Kraisba digi yaibao.

¹³ Tama tibaso, te nai tubogo eno ama te dwai s̄eba tulalumainogo ilibaso da, teda eno te mi munu ma tugobeo. Tiyu eno te eno ama te dwai s̄eba tulalubo s̄ē ilidalio.

9

Te Godigo po sela pabo sę bidi Pol bilali sęde po

¹ Te gasa we bidi me tau siyu tama augwali dolidali weyu, eno te gasa kolesaga me ebo dao. Ena olo mu bidibo dao, te gasa bidigo enabolo “E tiwai kolesaga yao” te po wabo usu egobeo. Tama me ena te Godigo po sela pabo sę bidi mu dao. Aga te gų pagede hodaluama tama nosali eno digi gedugo ena dago Genuai Bidi Jisas mu suai bidi dao. Te eno dago Genuai Bidi tobade sę yaligo tama te sęde naga dage te God wali pabo we bidi pedalali.

² Te bidi meba augwaligo ena te Godigo po sela pabo bidi meni da homu yali, tiali goli tagalao, duga koneani, ena te Godigo po sela pabo bidi bidibo. Suao, ena te Genuai Bidigo po sela pabo sę bidi bidibao, tama te koneabo sę te dagede elalubao.

³ Te bidi mebago eno dagede masigi sisąbaso ena te Godigo po sela pabo bidi meni da wabo si, tama eno e tiwai po te augwaliba wei ponobo dao:

⁴ te eno ebo sęde te Godigo po odobo we bidi augwaligo augwa doado bagego ena tau sobaso da, te dolo dawe ma meniwe? Te dolo mu dao.

⁵ Te gasa Godigo po sela pabo sę ebo bidi dabe augwali deli deligo te Godigo po wali pabo we kęnama, tama augwali te po pusubo sę eyu gasaba bilibadi te augwa we augwali dali hodobo pabo dao. Te dago Genuai Bidi Jisas aga ama dedego badi, te Pitago me te tama tebo dao.

Tama ena me, eno we elalugi sogo da, teda eno me te tiwai eyu da te usugi mu da.

⁶ Te gasa Godigo po sela pabo sę ebo bage tigi-dali augwaligo te Kraizde po pusubo sę sesemane sogo ebaso, tama augwa nogogo te masigi sabo sę ebo meni. Te ena me Barnabas da sigo naga te tiwai me ebo usu meniwe?

⁷ Mena bidi te ami sę ebo bidigo tama aga digi te aga tubo nai abelegowe? Te menio. Mena bidigo te gi bulama tama aga te gide bulali nai sabo meniwe? Me ma te bidi mego te kibu meme dali sipsip dali hani tonaluyu tama aga digi te augwaligo ame pę me tugobewe? Woo, te tiwai menio. Agai te nai meba tueibao.

⁸ Te eno tede bidigo homu naga wali pelama tama eno te tiwai po wabowe? Meni. Te bomai pode me te sę ebo bidigo aga pe masigi sabode te tiwai page elalubo po me elalubao.

⁹ Mosesgo te bomai pode te tiwai po aseani elalubao: "Te dagego wit ge dagalomainogo eyu tama te bulmakaugo te wit saęaęo agabo sę ebaso, teda nago te aga pedauwali me paniamuo," po wai. Te Godigo te bulmakau dabe augwa tubo nai sabode naga homu koneama wali dawew? *

¹⁰ Menio, te agai te po bidi dabolo me wali homu ebaso. Awe, te po aseani te da tobade wali dao. Magi baso meni. Godigo te tiwai kolesaga emainogo yai: bidigo te gi tę elibo sę eyu, tama bidigo te gide inaiani nai sabo sę ebo bidi me, augwali si augwa yali seęde te nai sabo homu elama tama te sę ebo dao.

* **9:9:** Bom 25:4; 1 Ti 5:18

¹¹ Tialima, dago te Godigo po dagebolo pusubo se yali, te dago te dagego homu noma bidi mobo tomode te ge bulali tiwai yai. Tama tibaso, dagego dabolo te tigi tau sabo nai naga mobaso, te dolo dawe ma meniwe? Te dobu si ebode te dage saqa paliwe? Te meni. *

¹² Te dagede bidi mebago te tigi tau sabo nai sabo usu ebo da wida, teda eno me te nai sigi sogo da, te usu mu egi dao.

Te nai dago sabo usu yaiba wali goli, te dago me sabeo. Menio. Dago te we bidigo Kraisinde wiegi yai gesi po odobo sunumi te panibo te dago hagela homu yai. Tama tibaso te haniani sege dabe dago tolobo dao.

¹³ Te Moni Lotu Be tempel, te bede se ebo bidi dabe, augwaligo te bede augwa nai sela tubo dao. Tama tiyu te Juda we bidi augwaligo te Godibolo maiabo nai magaselama, tama te be tomode te alta saide te nai Godibolo mabo se ebo bidi dabe augwaligo da te alta saide ulubo nai hasa mi meba te sela tubo dao. Tama tiyu augwaligo augwa nai abelebo menio, te augwaligo Godigo se ebode augwa nai tama sabo dao. *

¹⁴ Tama te tiwai naga dago Genuai Bidigo te bomai po muani: te Godigo wiegi yai gesi po pusubo se ebo bidi dabe, te sege augwaligo te wiegi yai gesi po sabo we bidigo tigi tau sabo nai meba somainogo yao. *

¹⁵ Tiali goli ena digi eno te tama tiwai nai me deli sisawai dao. Tama meggi me eno te nai saiba olama eno e po me asebeo. Menio. Te ena

* **9:11:** Rom 15:27 * **9:13:** Bom 18:1 * **9:14:** Mat 10:10; Luk 10:7

bolo hasia isimainao wai! Eno masigi sisabadi te se ebo dao. Tama eno te se de wiegi yai homu pemene ebao. Tama bidi me deligo enabolo masigi mayu eno te wiegi yai homu pemene ebo page te dagala samainogo me egobeo.

¹⁶ Eno te Kraide wiegi yai gesi po pusubo, tede eno te ena nogi ugwaba sabo te usu menio. Te menio. Eno sunumi gasa me elalubeo. Dago Genuai Bidigo enabolo te se naga mawai dao. Tama eno te wiegi yai gesi po pususiayu da, teda ena hobedagia mu bidaibao.

¹⁷ Te ena homugo digi eno te se egi da, teda eno te se de sabo usu egi da. Tiali goli, eno homugo te se eno yabo homu me isabaso da, teda Godigo te se enabolo emainu mawai dao.

¹⁸ Tama tibaso, te se de eno mena nai saibawe? Te eno sabo nai te e tiwai elalubao: te eno sainu elalubo nai te Godigo wiegi yai gesi po pusubo se de sabo elalubo, te eno me sabo meni. Menio. Eno te wiegi yai gesi po pusama tama eno augwaliba olo mabo dao. Tama tede eno dwagi yai homu pemene ebo usu baso, te wiegi yai gesi po olo pusubo kolesaga da eno sabo nai tiwai dao.

Pol te tigidali we bidigo se ebo bidi tiwai bidali

¹⁹ Ena da te bidi me deligo olo se ebo bidi me bidainogo me bidibe. Tiali goli te ena homugo ena digi te ena te tigidali bidi dologoba muyu, tama ena augwaligo olo se ebo bidi tiwai bidainogo homu elama ebao, te eno bidi hauwa sabo homu elama tibo dao. Augwali Jisas wali pabo bage pedalomainogo eyu ena tama ebo dao.

²⁰ Tama eno te Godigo wiegi yai gesi po te Juda dabebolo pusubadi, ena te augwali tiwai bidibo dao. Ena digi ena te Mosesgo mani bomai po dologoba pabe, tiali goli eno te bomai po dologode bidibo Juda bidi dabe sainogo eyu tama ena augwali tiwai gilama te bomai po dologode bidibo dao.

²¹ Te Juda hani isawai bidi dabe, augwali te Mosesgo mani bomai po meni yani bidi dabego gedude, ena te Mosesgo mani bomai po meni yani bidi tiwai pedalali, te bomai po meni yani bidi dabe sainogo tama tiali. Tiali goli eno te Godigo bomai po tagalainogo ebeo. Menio. Eno te Kraiso bomai po wali pabo dao.

²² Te Kraide konealubo po daw wabo bomo meni yani we bidi augwali eno tau sainogo eyu, tama ena te bomo meni yai bidi tiwai bidibo dao. Eno te tigidali sunumidu te gasa bidi dabego ebo kolesaga tigidali usu siyu, tama augwali tiwai bidibo dao. Augwali meba eno ma dobola somainogo tama ebo dao.

²³ Eno te se tigidali ebo te Godigo wiegi yai gesi po pusubo se te ugwaba somainogo ebo dao, tama te wiegi yai gesi pogo dabolo mabo dwagi yai nai meba me eno somainogo eno te tiwai se ebo dao.

Te dago te nai sigi painu bomonama udaiyao po wali

²⁴ Megi eno te po digi po begelama obao. Te udabo ususu si ebo bidi dabe te tigidali augwali udulama, tama te geanani bidi deligo naga te dwagi yai nai sabo dao. Te dagego konebewe? Tialima, dage me te tiwai bomonama Godigo po

bugagia mu wali piào, agai te dagebolo dwagi yai sẹ emainogo yao.

²⁵ Tama tigidali bidigo te nai sainogo homu eyu udabo da, te augwaligo homu dali, te augwaligo tigigo ebo kolesaga dali, te tigidali augwaligo aiyaba elaluyu bugagia tonalubo dao. Te bidi dabego tama tiyu te geanani bidigo sabo dwagi yai nai sainogo tebo dao. Tiali goli te nai polo dolobo nai naga dao. Me ma, dago Godigo po wali peyu te me dolisabo nai sabo sẹ ebo dao.

²⁶ Tama tibaso, ena digi me, ena te dwagi yai nai me sainogo eyu tama ena udabadi te eno gasaba tonono peyu me udagobe. Eno nogo wabi hwɔinogo, te eno nogo subigila sanama olo dali nogo me sago beo, tama te wali naga me eligobeo.

²⁷ Menio. Eno te ena tigiba mu eliyu tama aga ena homu wali pomainogo ebo dao. Magi baso meni. Eno te Godigo wiegi yai gesi po te gasa we bidi hauwabolo pusubo dao, te augwaligo te po bugagia wali pomainogo ebo dao. Tiali goli nosali ena digi te eno te po bugagia wali pisayu tama ena tulaluidali weyu, tama eno bomonama te eno ebo kolesaga bugagia tonalubo dao.

10

Dago te tibo god dabe wali pelamuo

¹ Ama dedeo, dage ede gegeda pelamuo: dago wai dabe tigidali te bidi meni yai dwai bulude bilibadi augwali te dagalu po dologode bugagia bidali. Tama augwali tigidali te sago naga

pelama, tama te tamu ʻāi nogeyu sana pai dao.
*

² Tama tigidali augwali te pōde tamu ʻāi side baptais sali tiwai yali, tama te baptais saligo augwali te Moses wali pomainogo sa muani.

³ Tama augwali tigidaligo te Godigo Tedali Mobo Bidigo augwali mani te nai nogi mana augwaligo tuai dao. *

⁴ Tama augwali tigidaligo te Godigo Tedali Mobo Bidigo augwali mani ʻāi te augwaligo tuali. Awe, augwaligo te Tedali Mobogo te genuai sau pado masigidu asobo ʻāi tuali, te masigi augwali dali hodobo pai. Te masigi te Kraisa aga digi dao.
*

⁵ Te Godigo te tobage tau sabo sē tigidali augwali dali yali goli, agai te we bidi dago wāi dabe hauwa tomode augwaligo kolesaga te Godigo godolo me isiʻawani. Mu menio. Magi baso meni. Dago koneai, augwali umabo te bidi meni yai bulude isilama, tama augwaligo tigi tede besela palama, wilalua pali, te bidi si sela naga bugagia sana pali. *

⁶ Tama te augwalide pedalali sē tigidali te noma tiwai pedalali, te dago sulama tama dago wāi dabe augwaligo te pesā yali tiwai te dago me te dwai sēde pesā idali weyu dago sumainogo yali.

⁷ Tama suyu, tama dagego te tibo god dabebolo lotu po munu me wagimio, te augwali tomode mebago yali sē tiwai me egio. Te bukude te

* **10:1:** Sai 13:21-22; 14:22-29 * **10:3:** Sai 16:35 * **10:4:** Sai 17:6; Nam 20:11 * **10:5:** Nam 14:29-30

augwaligo te tibo god dali yali sède e po wai dao: “Te we bidi augwali dualama te nai tuyu wẹ tuyu elama, tama augwali hogodama tama augwaligo tẹabi yali.” *

⁸ Tama dago me te penani ebo kolesaga me egimio, te augwali tomode mebago te yali kolesaga tiwai me egio, tama deli sogo naga te bidi sese umabo te 23,000 bidi te augwali isai dao. *

⁹ Tama dago me dwai sẹ eyu te Genuai Bidi usu me selamuo. Te augwali tomode mebago dwai sẹ eyu aga usu sobaso, tama te dwai hasamani dabego augwali gaḡ kelama tama augwali isai dao. *

¹⁰ Tama dagego dwai homu eyu Godibolo wado po me olamuo. Te dago wai dabe augwali tomode mebago te God dali dwai homu eyu wado po obaso, tama te bidi ela mubo ensel mobo bidigo te augwali ela munama tama augwali dolai dao. *

¹¹ Te sẹ dabe tigidali augwaliba pedalali, te gasa we bidigo sumainogo ebo sẹ noma tiwai pedalali. Tama dago me te tobage dwai sẹ idali weyu gasa bidi dabego te po te Godigo po bukude aseani. Magi baso meni. Te da megi bidibo sogo te tigidali nai silabo sogo paḡa yagasai dao.

¹² Tama tibaso, dagego duga digi bomogo bugagia dolalubo usu da homu eyu da, teda dage tulaluyu dolidali weyu dage bugagia suo.

¹³ Te dwai sẹ ilibo usu sabo sẹ dagebolo pedalobo, augwali tigidali te gasagi yai me egobeo.

* **10:7:** Sai 32:6 * **10:8:** Nam 25:1-18 * **10:9:** Nam 21:5-6

* **10:10:** Nam 16:41-49

Menio. Te tigidali we bidibolo pedalobo usu sabo deli tigi poai sę pedalubao. Tama Godigo aga dage dali homugo keę pai bidi bidiyu tama aga daę wali po wali peyu, te usu sabo sę ebogo dagego bomu aiyaba elaluainogo ebo gogolama me sula tagalogobeo. Menio. Te dwai sę tomoba kegebo usu sabo sę dageba pedalubaso da, teda Godigo dage sana pabo tu nigilaibao. Te tu e dao: te agai dage daę walama, tama dage te usu sabo sęde bomu elama dolalubo usu yaibao.

¹⁴ Tama tibaso, eno abagi dede dabe muo, dagego te tibo god lotu beba nai tugi pabo kolesaga wi eyu tagalama, tama te kolesaga tudiba muao.

¹⁵ Dagego kolesaga elalubaso, tama eno dagebobo te po obao. Duga digi eno pusubo po dagalięo. Eno po e dao.

¹⁶ Te dago komunion tubaso da, dago te kapde gedu haluasa po olama tama Godibolo puba hwi po wabo dao. Te kapde elalubo wain ęi da tigidali deli deligo tubo si da, tebogo dago te bidi Kraisgo tigi kaneme dobayu tubo dao. Tama dago komunion tubadi, dago te dwasianu pebedama dobaba pabo bret, dago te bret tubo si da, tebogo dago te bidi Kraisgo tigi mi dobayu tubo tiwai ebo dao. *

¹⁷ Te komunion tubo bret te deli naga elalubao, tama da we bidi hauwa elaluali goli, te tigi delide naga wadolali elalubao. Magi baso meni, da tigidaligo te bret deli naga tubo dao.

¹⁸ Dagego te Israel dabe augwaligo yali kole-

* **10:16:** Mat 26:26-28; Mak 14:22-24; Luk 22:19-20

sagade homugo kone palao. Godigo augwaligo yali dwai se sela sawainogo eyu, tama augwaligo te sipsip dali meme dali selama, tama te pris bidi dabego nogoba mawai. Tama menama, tama te pris bidi dabego te nai dabe ela munama, tama te mi te alta sai ugwadu daiba muyu, tama siago uluyu, tama Godibolo ofa tama mawai dao. Tama tiyu te nai sesali bage dali, te pris bidi dabe dali, augwali tigidaligo te altade ofa mani nai tuyu deli hani naga bidiyu tama bidali. *

¹⁹ Eno magi homu elama tama te po waliwe? 'Te tibo god me aga mu bidibao, te agabolo ofa mabo tubo nai me te sege nai mu dao,' eno te tiwai homu elama te Israel dabego Godibolo ofa mabo kolesagade po waliwe?

²⁰ Mu menio. Eno wali po page e dao: te Godigo po odisawai bagego augwa alta saide ofa ebo nai, te augwaligo dwai haubo noma bidi dabebolo te ofa mabo dao. Augwaligo te Godibolo ofa me mabeo. Tama dage te dwai haubo noma bage dali deliba sisinibo te eno godolo me egobeo, ena mu hagelabo.

²¹ Dagego te dago Genuai Bidi Kraisgo kap wain we tuyu, te dwai haubo noma bagede lotu wainogo eyu augwaligo kapde dali si we tuyu ebo usu me egobeo. Te dagego dena Genuai Bidigo ni nami tebol saide nai tuyu, te dwai haubo noma dabego lotu bede tebol saide nai dali si tuyu ebo te usu me egobeo.

²² Dago augwaligo te tibo god bagebolo ofa mani nai tuyu da, teda dago te Godigo da dali

* **10:18:** Prs 7:6

dwai homu ebo sę ilaibao. Dago bomogo agai bomo aiyaba elalubo da, agawe? Te dago bomu usu menio.

Tigidali sę ebogo dago Godigo nogi ugwaba sao

²³ Dage tomode bidi mebago e po obao, “Te mi tubo kolesagade te da olo bidibo dao, tede habu selebo po meni. Dago te mi tuyu da, tebogo dago Godigo bomu yai po me bologobeo,” augwaligo te po wabo dao. Awe, mu tama. Tiali goli te tigidali sę ebogo da tau me sogobeo. “Te haniani sę hauwa dago yabo te usu dao,” augwaligo te po me wabo dao. Tiali goli te tigidali sę ebogo da God wali pabo bomu mabo meni.

²⁴ Bidi me deligo aga digi naga bugagia bidabo homu me elamuo. Menio. Tigidali we bidi deli deligo te gasa bidi bugagia bidimainogo homu eyu tama augwali tau sabo kolesaga yao.

²⁵ Tigidali haniani mi augwaligo te maketde elalubo, te dagego abela tuyu da, te usu da. Po meni. Dagego homu hauwa elama tama ‘E mi augwaligo te tibo god me delibolo ofa maniwe, ma meniwe?’ te po hanalu wagio.

²⁶ Magi baso meni. Dago koneani, te bukude elalubo po me deli e tiwai dao, “Te e tęde, paęanalubo tigidali nai dabe dali, te Genuai Bidigo naga dao.” *

²⁷ Tama te Kraisba aga homu tigidali mu-siawani bidi me deli agai te dage meba i olama dage dali nai tuainogo ebaso da, tama dage pabo homu ebaso da, te usu da. Augwaligo dagebolo mabo te nai tigidali dagego tuięo. Tama dagego

* **10:26:** Tib 24:1

homu hauwa elama ‘E mi augwaligo te tibo god me delibolo ofa maniwe, ma meniwe?’ te po wagio.

²⁸ Tiali goli, te bidi me deligo te po dagebolo weyu, “Te mi da, te ofa yai mi da” po obaso da, teda te bidigo dagebolo wali po te dagego homugo koneama, tama aga tobade dagego te nai me tulamu dao. Dwai sẹ dwagi yai sẹ dagalabo homu dolidali weyu te nai tugio.

²⁹ Eno dagebolo te po te dagego dwai sẹ dwagi yai sẹ dagalabo homu tobade te po wabeo. Meni. Eno te dagebolo te mi tubode po wali bidi agai te dwai sẹ dwagi yai sẹ dagalabo homu tobade te po dagebolo obao. Magi baso meni, te agai homu si eyu bidibao.

Dage tomode bidi me deligo te po hanalu waibao, “Ena digi ena haniani nai tubo usu yabo digi, tama gasa bidigo te ebo kolesaga dagalabo homugo digi eno ebo kolesaga magi baso te dagalaibawe?

³⁰ Te eno te tubo naide Godibolo puba hwi po olama te nai tuali goli, te gasa bidigo eno te puba hwi wali tubo naide te magi baso ena dali dwai po waibawe?”

³¹ Te dage tomode bidi me deligo te po obaso, eno e po agabolo wei ponaibao, te dagego te nai tuyu me wẹ tuyu ebode, ma dage gasa sẹ ebo si da, dagego gasa we bidide homugo koneao, augwaligo Godigo nogi ugwaba somainogo eyu dagego duga kolesaga tigidali tama bugagia tiao.

³² Tama tiyu, dagego te Juda dabe me, te Grik dabe me homugo koneao, tama Godigo po odobo we bidi hani dabe me, tama dagego ebo sẹde

augwaligo God dali agai po dali si dali dwai homu idali weyu, dagego duga ebo kolesaga bugagia tonalua.

³³ Ena me eno te tiwai kolesaga ebo dao. Eno homugo te eno ebo kolesaga tigidalide te we bidi tigidali augwaligo dwagi yai homu naga emainao. Tama te homu ebaso, eno ena digi naga bugagia bidabo homu me egobeo. Meni. Eno homugo te eno tigidali we bidi augwali tau siyu, tama Godigo augwali ma dobola somainogo eyu, tama eno ena ebo kolesaga tigidali tama dodolobo dao.

Polgo po weyu te Tedali Mobo Bidigo mabo wiegi yai se ebo me te lotu wabo wiegi yai kolesaga yabo po wali

11

(Daj 11-14)

¹ Te we bidi tigidali agai augwali tau somainogo eyu Krai agai aga digi aiyaba muyu bidali. Tama ena me eno agai te yali kolesaga wali pabo dao. Tama dage me dagego ena wali asiyu, tama te tiwai kolesaga naga yao.

Polgo te lotu wabode tobolu halubo kolesagade ebo po

² Dagego sesemane sogo ena homugo koneama tama eno te selama dagebolo mani po tigidali daj eyu wali pabo dao. Tama tibaso, eno te po obao, dagego wiegi yai kolesaga mu ebo dao.

³ Me ma, te dagego ena te po hanalu wali, “Te da deliba sisinama tama Godibolo po weyu, tama Godigo po odoyu tebo sogo, te dago we dabe sibi augwaligo augwa tobolu te nami ugwago haluaibawe ma meniwe?” te po dagego ena hanalu wai dao. Tiali goli eno homugo hasia dagego te po konemainogo obao: te bidi Kraisgo tobolu bidi te God dao, tama tigidali bidigo tobolu bidi te Krai dao, tama wego tobolu te aga bidi dao.

⁴ Te dage deliba sisinama tama bidi mego tobolu haluama tama Godibolo po weyu, ma te Godigo po pusuyu da, te bidigo aga tobolu bidi Kraisba hale mabo dao. Te dwali.

⁵ Tama we me deligo te aga tobolu halusiama tama Godibolo po obaso, ma Godigo po pusubaso da, te agai aga bidigo tobolu bidi tama tiwai bidiyu, aga aiyaba elalubo dao. Te dwali. Tama tiyu da, te aga te hale isašo moni tudu bilibo we tiwai dao.

⁶ Te tobage dwai penani kolesaga ebo we hale ilimainogo augwaligo aga tobolu nisi tigidali mu poabo dao. Tama te dage tomode te we me deligo aga tobolu halusiama tama Godibolo po obaso, te wego te se ebogo aga bidi tama aiyaba elalubaso, aga tobolu nisi mu poa yao. Tiali goli we aga tobolu nisi mu poabo te moni hale iliyu da, teda te we te lotu obadi aga tobolu te nami ugwago halumainao.

⁷ Bidigo te aga tobolu me haluamuo. Magi baso meni, te Godigo bidi nigali sogo agai aga digi tiwai nigalio, tama te bidibolo Godigo aga digi wiegi yai homu kolesaga tiwai mani. Tiali goli te

we aga te aga bidigo kolesaga naga elalubo dao.
*

⁸ Magi baso meni. Godigo bidi nigali te wego tigigo me nigibeo. Menio. Agai we nigali te bidigo tigigo nigai dao.

⁹ Tama Godigo te we homu koneama tama bidi nigilama aga tau somainogo me ebeo. Menio. Agai bidi homugo koneama tama wego aga bidi tau somainogo nigalio. *

¹⁰ Tama tibaso, te Godigo se ebo ensel mobo bidi augwaligo te we aga bidi dologode bidibo sumainogo eyu, te wego aga tobolu te nami ugwago halumainao.

¹¹ Tialima da we bidi te dena Genuai Bidi dali wadoloyu bilibode, tede te we naga tedali bidiyu tama bidi meniama, tama bidi naga tedali bidiyu, tama we meni eyu me ebeo.

¹² Menio. Godigo hasia sogo te we bidigo tigigo nigali, tama tialima meggi te tiwai te agai bidi wego tigide nigilama pedalobo dao. Tiali goli God da te tigidali nai nigali bidi mu dao.

¹³ Duga digi te eno meggi wali po dagalião. Te wego tobolu halusiana tama Godibolo po wabo, te kolesaga usu egowe?

¹⁴ Te we bidi dena kolesaga digi te tiwai dagebolo ola mabo dao: te bidigo bobage tobolu nisi elalubaso da, te dolo meni.

¹⁵ Tiali goli te wego bobage tobolu nisi elalubaso da, te aga wiegi yai au yabo nai elalubao. Magi baso meni, Godigo bobage tobolu nisi agabolo mani te aga tobolu halualumainogo

* **11:7:** Gag 1:26-27 * **11:9:** Gag 2:18-23

yali.

¹⁶ Tialima, bidi me deligo te wego Godibolo po obadi aga tobolu haluabo sède konila po wabo homu eyu da, te agai koneao, dago gasagi yai kolesaga me elalubo meni, tama gasa bulude bidibo Godigo po odobo we bidi hani dabego me te gasagi yai kolesaga me elalubo menio. Da tigidaligo te we aga tobolu haluabo kolesaga wali pabo dao.

Te komunion nai tubo po

¹⁷ Tialima megì eno te bomai po meba dagebolo mawainogo ebao, tiali goli dagego te ebo sède te eno dage nogi ugwaba siyu dagego wiegi yai kolesaga mu ebo dao te eno wagobeo. Magi baso meni. Te dage sisinibo si, te wiegi yai kolesaga me pedalobeo. Menio. Te dwai kolesaga pedalobo dao.

¹⁸ Tede hasia bolo eno te po obao: te dage lotu wainogo sisinibo sogo, dage tedali tedela pabo dao. Eno te tiwai po dagede odobao. Tama eno homu te po meba te mu po dao, dagego te tiwai ebo dao.

¹⁹ Awe, eno koneani, te dage tomode te Godigo pode homu mu kẹ̀a pai we bidi augwali hania hanilama pedalomainogo eyu, te dage bidi mebago pode dwasianu tedela pabo kolesaga te me sogo pedalaibao. Te eno koneani.

²⁰ Tialima dage tigidali sisinibo sogo dagego te dago Genuai Bidigo komunion nai tubo kolesaga ebo dao. Tiali goli te mu meni.

²¹ Menio. Te dage tedelama, tama dage tigidali deli deligo te duga digi duga nai naga polo

selama tama tubo dao. Tama me deligo nai tubo silisabadi, tama mego gasa bage dali aga nai dobasiama te aga nai tubo polo silama, tama te wain bomai ɔ̄ hauwa tulama wabo pabo bidi tiwai eyu ebo dao.

²² Magi basowe? Te dagego nai tuyu wɛ̄ tuyu yabo be elalubao. Te duga bede duga nai hasia tuao, tama nosali deliba sisinama te komunion nai tuao. Ma, dagego homugo te Godigo po odo bo we bidi te olo nai tiwai da homu elama, tama dagego te meba nai meni yani ama dedebolo hale mabo homu eba, agawe? Tede eno mena po dagebolo wagawe? Ma, eno dage nogi ugwaba somainogowe? Menio. Te sɛ̄de te eno dage nogi ugwaba munu me sogobeo.

²³ Magi baso meni. Te eno dagebolo mani po te eno dago Genuai Bidide naga te ola mani po sali. Te e tiwai dao: te pio hulide Judasgo Jisas te Juda dabe boi bidigo nogoba musiabadi, te sogo pio hulide te Genuai Bidi Jisasgo

²⁴ te bret selama, tama te naide Godibolo puba hwi po olama, tama te bret pebedama, tama aga dali bidali bidi dabebolo mayu, te po wali, “Te eno tigi dao, te eno dage tobade mobao. Dagego tigidali sogo tama tidu gebo si ena homugo koneao,” agai te po wai.

²⁵ Augwaligo augwa hulide tuabo nai tula silibo si, tama agai te kap me selama, tama tiwai naga Godibolo puba hwi po olama, tama augwalibolo mayu te po wali, “Te kapde elalubo wain ɔ̄ te eno kaneme dao. Tama te kanemego eno te gesi dɔ̄u wali po dɔ̄u obao. Tigidali sogo dagego e ɔ̄ tubaso da, teda dagego tama tiyu ena homugo

konealuao,” te bidi Jisasgo te po wai. *

²⁶ Tama tibaso, dago Genuai Bidi aga ma asisabadi te tigidali sogo dagego te bret dali te kapde dali wẹ tubo si, dagego te aga isali po pusubo dao.

²⁷ Tama tibaso, bidi me deligo hasia bugagia homu kone palisiama tama Genuai Bidigo te bret dali te kapde ąi dali olo subigila tuali da, tebogo agai te Genuai Bidigo tigi me kaneme te dolobo tiwai ilali, tama aga tede seęę elalubao.

²⁸ Te komunion tubo sogo te bidigo aga digi homu bugagia osalama tama usu yali homu eyu da, teda aga te bret me te kapde te ąi tuao.

²⁹ Magi baso meni, bidigo te dago Genuai Bidigo tigde homu kone bugagia palisiama, tama agai te bret me te wẹ me olo subigila tuyu da, teda agai bret me wẹ me tuali tede Godigo agabolo te seęę menama tama dwai se agaba pedalaibao.

³⁰ Te page delide naga te dage tomode we bidi hauwa augwali tigi bomo meniana, tama augwali gasi elama, tama augwali meba me isalio.

³¹ Te dago dena homu hasia bugagia osola suyu da, teda te Godigo dabolo te seęę magobeo.

³² Tiali goli, Genuai Bidigo dago ebo kolesaga osola sulama, tama dabolo dene osogo mobaso da, tede te da aga wai bọu tiwai dodolobao. Agai tama tebo te da tọde bidi dabe augwali dali nosali mu hagaidali weyu tebo dao.

³³ Tama tibaso, eno ama dedeo, dage te nai

* **11:25:** Sai 24:6-8; Jer 31:31-34

tuboba sisinainogo da, dagego te gasa bage augwali asobo hasia tonalua.

³⁴ Te me deli moni nasi ebaso da, te agai bede nai tuao. Tiyu dage deliba sisinibo kolesagade Godigo dagebolo seḡe magobeo. Te gasa kole-sagade elalubo po, te nosali ena dageba asobo sogo te eno dodolaibao.

12

Te Tedali Mobo Bidigo haniani se yabo homu kolesaga dobabo dao

¹ Eno ama dedeo, te Godigo Tedali Mobo Bidigo te haniani se yabo homu kolesaga dabolo mabode, te dagego tede gisiga konesiama bididali weyu eno tede dage homu dodolabo po me megii pusaibao.

² Dagego koneanio, polobadu dagego te Godigo po odisabadi, te sogo augwaligo haniani kolesaga ebogo dage te po meni yai tibo godiba kekasa pelama, tama dagego augwali wali naga piduai dao.

³ Tama tibaso, eno homugo dagego hania koneao, te Godigo Mobo Bidi te bidi me deli dali bidama tama agabolo po mobaso da, te bidigo te po me wagobeo, "Jisas hagamainao, agaba dwai se pedalomainao," te po munu me wagobeo. Me ma, te Tedali Mobo Bidi meni yani bidigo "Te Jisas da, te Genuai Bidi dao" po wabo te usu me egobeo.

⁴ Te Godigo Tedali Mobo Bidigo haniani se yabo homu kolesaga dabolo olo mu mabo dao, tiali goli te Godigo Mobo Bidi deli naga elalubao.

⁵ Tama dago dena hasi haniani tau sabo se ebo, tiali goli dago Genuai Bidi deli naga bidibao.

⁶ Te haniani tau sabo se ebo homu kolesaga elalubo, tiali goli te God deligo naga te tigidali bidibolo bomo dali homu kolesaga dali si menama, tama augwaligo tigidali tau sabo se ebo usu yaibao.

⁷ Te Tedali Mobo Bidigo aga bomo te tigidali we bidi deli delibolo pedalobo dao. Tama elama, tama augwali deli deligo te mani bomogo te Godigo po odobo we bidi hani tau sabo usu yaibao.

⁸ E tiwai dao. Te Godigo we bidi hani tomode te bidi me delibolo te Tedali Mobo Bidigo te we bidi dabebolo te Godigo wiegi yai homu kolesaga ola maiabo homu kolesaga agai olo mabo dao. Tama te gasa bidibolo te Tedali Mobo deligo naga te Godigo kolesaga te we bidi augwaligo bugagia konemainogo te po pusubo se ebo homu kolesaga mabo dao.

⁹ Tama te Tedali Mobo Bidigo gasa bidi mebolo te bomu mayu, tama te bidigo Godiba aga homu tigidali mayu agaba tialubo kolesaga, te kolesaga bomu menama tama te bidigo homu si isiabadi tama agai genuai se ebo usu dao. Tama gasa bidi mebolo te haniani gasi yai we bidi dabe usu ilabo bomu te Tedali Mobo Bidi deligo naga mabo dao.

¹⁰ Tama gasa bidi mebolo te Tedali Mobo Bidigo te haniani bomai se yabo bomu mabo dao. Tama gasa bidi mebolo te Godigo po pusabo kolesaga agai mabo dao. Tama mebolo te haniani dwai haubo noma bidi dali te dwagi yai noma bidi dali dagalabo kolesaga agai mabo dao. Tama gasa

bidi mebolo te Godigo Mobo Bidigo te t̄ode bidibo we bidigo homugo konesīawai po wabo kolesaga mabo dao. Tama agai me te gasa bidi me delibolo te hasia bidigo wabo po begelabo kolesaga olo mabo dao.

¹¹ Eno megi tama nedada pali haniani s̄e yabo homu kolesaga augwali tigidali te Godigo Mobo Bidi deligo naga te nigibo dao. Te aga homugo digi agai te gasa s̄e yabo kolesaga te gasa bidi me delibolo dobayu, tama gasa bidi mebolo te gasa s̄e yabo kolesaga mayu ebo dao. *

Da tigidali da tigi delide s̄e hauwa elalubo

¹² Te bidi Kraisi da te bidigo tigi me deli tiwai dao, tama te tigigo nogo s̄aga me, te haniani nai hauwa te elalubao. Tama te tigigo haniani gasagi gasagi yai nai hauwa elaluali goli, te tigi deli naga dao.

¹³ Tama da me te tiwai elalubao. Te da meba te Juda hani da, da meba te Juda hani bidi āq isīawai bage dao, meba te masigi sis̄abo olo s̄e ebo we bidi da, meba olo s̄e isīawani we bidi dao. Tiali goli te Tedali Mobo Bidi delide naga da tigidali te baptais selama tama deli tigi poāi naga pedelali, tama Godigo te Tedali Mobo Bidi deli naga dabolo mawai dao. *

¹⁴ Te bidigo tigde, te dago koneani, te tigi te deli badu naga me elalubeo. Menio. Te aga haniani s̄e yabo nai elalubo dao.

¹⁵ Te s̄agāgo te tiwai po wagi sogo da, “Ena te nogo meni, tama tibaso ena te tigde me wadoalubeo,” te s̄agā aga togolama tedali

* **12:11:** Rom 12:6-8 * **12:13:** Rom 12:4-5

agaduba elalueibao wabo digi, tagalao. Te meni. Aga te tigi badu naga me wadoalubo dao.

¹⁶ Tama ologo te po wagi sogo da, “Ena te gedu meni, tama tiyu ena te tigide me wadoalubeo,” te olo aga togolama tedali agaduba elalueiba wabo digi, tagalao. Te meni. Aga te tigi badu naga me wadoalubao.

¹⁷ Te tigi sesede te gedu naga elalugi sogo da, magi ilama te agai po odaibawe? Tama te tigi sese te olo naga elalubaso da, teda magi ilama agai te nai denami ebo odaibawe? Meni, te tiwai usu egobeo.

¹⁸ Tiali goli tigi te tiwai me elalugobeo. Menio. Godigo aga digi homu wali peyu, te tigi tigidali badu te haniani sę yabo nai deli deli muna muna pali, te aga digi godolo yainogo tiwai dao.

¹⁹ Tama tigi sese te deli sę yabo nai naga elalugi sogo da, teda te tigi mu te menade elaluaibawe?

²⁰ Tiali goli te tiwai me egobeo. Menio. Te tigi badu haniani sę hauwa yabo nai elalubao, tiali goli te tigi deli naga elalubao.

²¹ Tama tibaso, gedugo te nogobolo te po wabo usu me egobe, “Te nogo, nage bidigi menigi sogo da, te enaduba deli ena bugagia bidigi dao.” Tama tobolugo me sę sę bolo te po me wagobeo, “Te sę sę, nage bidigi menigi sogo da, te enaduba deli digi ena bugagia bidigi dao,” te po wabo usu me egobeo.

²² Mu menio. Te tigi dabe badu dago te bomo meni homu yali, te me elalusiawani da, teda te tigi bugagia me elalugobeo. Mu menio.

²³ Tama te tigi dabe badu dago homugo augwali te dwasianu dwali homu yali, te dago

augwali bugagia tonalubo dao. Tama te tigi wiegi yai isiawani dabe badu, tede dago hale idali weyu, dago augwali te gudubo ugwago halua sabo dao.

²⁴ Tiali goli te dago augwalide hale isaɓo badu, te dago gudubo ugwago halua sabo menio. Tiali goli Godigo te tigi dabe tigidali te deli badu wadolai elalubao. Tama me badu augwali te nogi meni yai tiwai elaluali, teda agai augwalibolo te nogi ma mayu ebo dao.

²⁵ Agai tama tiwai ebaso, te augwali tedali me pebeda pogobeo, menio, te tigidali deli deli badu te augwaligo augwa hasi te gasa badu te deli se tiwai naga eyu bugagia tonalumainogo ebo dao.

²⁶ Tama tiyu te tigi me badu pedai badu dene eyu da, te tigidali badu dwai bidaibao. Tama me deli badu te nogi sobaso da, te tigi tigidali badu augwaligo te aga dali wiegi yai homu yaibao.

²⁷ Tialima dage da, da tigidali deliba wadolama, tama dage da te Kraisgo tigi tiwai dao. Tama dage deli deli te Kraisgo tigigo haniani se yabo badu dabe dao.

²⁸ Tama te Godigo po odoɓo we bidi hani tomode Godigo aga digi te se dodolama, tama tigidali bidi te haniani seɓa muani. Te hasia te po sela pabo bidi dabe nigilali, te si wali te Godigo po pusabo bidi dabe, te sela wali te agai po ola mabo tisa bidi dabe muani. Te dabe tudi badu nosali te bomo menama, te bomai se ebo bidi dabe nigilali. Tama nosali ma te gasi yai bidi dabe usu ilibo bidi dabe elalubo, tama te we bidi dabe tau sabo bidi me, tama te haniani se dabe tonaluabo bidi dabe muani, tama haniani

homugo konesiabo pogo po wabo bidi nigilai. *

²⁹ Magi yaliwe? Te Godigo po odobo we bidi hani tomode te tigidali bidi te Godigo po sela pabo se ebo bidi dabe bidibo dawe? Ma, tigidali te po pusabo bidi bidibawe? Ma, tigidali te po ola mabo tisa bidi bidibawe? Ma, tigidaligo te bomai se ebo bomo elalubawe?

³⁰ Ma, tigidaligo te gasi yai bidi dabe usu ma ilibo bomo te elalubo dawe? Ma, tigidaligo te haniani homugo konesiabo pogo po wabo dawe? Ma, te tigidaligo te gasa bidigo wali po begelebo se ebo usu egowe? Mu menio!

³¹ Tiali goli dagego bomo eyu tama godolo elama, te Godigo dabolo olo mabo agai we bidi hani tau sabo bomo tigidalide te polali nai sao.

Tama megie eno dagebolo te polalubo tu mu me deli te dagebolo ola maiabo homu ebao.

13

Te we bidi dali dwagi yai homu eyu godolo mu ebo kolesaga po

¹ Te haniani dago homugo konesiabo pogo po wabo, tede eno po tamadi wai dao. Te eno te da tode bidibo we bidigo dena homugo konesiabo haniani pogo wabo, ma te tode bidi dabego wabo haniani po, ma te ensel mobo bidi dabego gasagi yai po me, te po tigidaligo eno po wabo usu eyu da, tiali goli eno te gasa we bidi dali dwagi yai homu eyu godolo ebo kolesaga esiayu da, teda eno po wabo te belo olo subigila elibo tiwai eyu,

* **12:28:** Ef 4:11

ma te moni nigo nigali habidi te olo elibo tiwai gilama yaibao.

² Ma, eno te profet bidigo wabo po tiwai te Godigo po pusubo bomo elaluyu, tama eno te Godigo geme dualali po tigidali koneyu, tama eno gasa haniani homu kolesaga me koneyu, tama eno Godide bomai konealubo po daꝝ elaluyu, tama eno te genuai bulu du gasaba pogolobo usu iligi da, ena te tiwai bidiyu, tiali goli eno te gasa we bidi dali dwagi yai homu eyu godolo ebo kolesaga esiꝝyu da, teda ena te olo nai tiwai dao.

*

³ Tama eno ena doado bage tigidali te magi nai meni yai we bidi dabe augwalibolo mena mena pelama, tama ena te Kraisde boi bidi homu ebo bagego selama, tama eno tigi te siaba ulama tama ena te isiyu da, tiali goli eno te gasa we bidi dali dwagi yai homu eyu godolo ebo kolesaga esiꝝyu da, teda te eno yali tigidali dwagi yai seꝝo ena dwasianu tau sabo usu me egobeo.

⁴ Te gasa we bidibolo wiegi yai homu eyu godolo ebo bidi agai e tobage kolesaga ebo dao. Augwaligo dwai kolesaga aga dali ebaso, te agai wei polo me ponogobeo. Te gasa we bidibolo wiegi yai homu eyu godolo ebo bidigo, te agai tigidali bidi tau sobao. Agai te doado bage hauwa elalubo bidi dali dwai homu me egobeo. Te gasa bidibolo wiegi yai homu ebo bidigo te aga digi aga nogi ugwaba me sogobeo. Tama agai dwai hagoma me egobeo.

⁵ Agai te bidi dabe augwali dali te kolesaga usu

* **13:2:** Mat 17:20; 21:21; Mak 11:23

isawai bidigo ebo kolesaga ebo meni. Agai te aga doado bage dabede te nai yogo homu ebo meni. Te agai seḅḅ polo me egobe, konila po polo wagobeo. Te augwaligo agabolo dwai seḅ ilibaso, te agai te seḅe aga homugo ma nededu gebo meni.

⁶ Te gasa bidigo ebo dolo isawai kolesagade te agai wiegi yai homu pemene me egobeo. Menio. Agai te we bidi augwaligo Godigo mu doloba pai kolesaga ebode te wiegi yai homu pemene agai ebo dao.

⁷ Te gasa we bidibolo wiegi yai homu eyu godolo ebo bidi agai tigidali seḅḅ bugagia tolobo dao. Te tama tiyu, agai aga abagi dali homugo keḅ pai bidi bidada pabo dao, te kolesaga me sia sogobeo. Te aga dali dwai seḅ yali abagi, tede agai wiegi yai homu pemene eyu tama te bidigo homu hasegelebo aga bugagia tonalubo dao, agai te kolesaga ebo tagalogobeo. Te tigidali seḅḅ sabode te aga bomo elama bugagia dolalubo dao, aga munu me seḅḅ polo egobeo.

⁸ Te Godigo aga we bidibolo te tau sabo bomo osogo mawai dao. Agai bidi mebolo te Godigo po pusubo bomo olo mayu, tama gasa bidibolo te haniani gasagi yai homugo konesiabo pogo po wabo bomu olo tama mayu, tama tedali bidibolo gasa haniani homu kolesaga koneabo bomu mayu ebo dao. Te tobage mani seḅ yabo bomu te osogo elalubo nai naga dao. Tiali goli te gasa we bidi dali dwagi yai homu eyu godolo ebo kolesaga da, te gamonabo kolesaga mu dao, te munu me siligobeo.

⁹ Te megii dago haniani homu kolesaga kone-

abo bomo te sese meni, te sqa pali. Tama te Godigo po pusubo bomo me, te sese meni, te sqa pali.

¹⁰ Tiali goli nosali te sese usu mu yai nai asiyu, tama te sogo te sese isawai sqa pali nai dabe tigidali silaibao, te augwaligo se me meni.

¹¹ E tiwai yaibao. Polobadu ena dwasianu ogwa bidibadi, te sogo eno dwasianu ogwago po wabo tiwai yai dao. Eno te dwasianu ogwago homu ebo se tiwai yai dao. Eno te dwasianu ogwago homu dodolobo kolesaga tiwai me eyu bidai dao. Eno kuna konesiabaso, eno haniani sede sqa peyu bidali. Tiali goli nosali ena genuai bidi pedalama, tama eno bugagia konebaso, eno te dwasianu ogwago yali kolesaga yali te tagalai dao.

¹² Dago te ai dulade subadi, te dena gesabidi dago kuna subo meni, te dwasianu hulua sai tiwai subo dao. Tama te tiwai me, dago God gisiga mu konebo menio. Tiali goli te sogo nosali da, te dago Godigo gesabidi mu dolo sueibao. Megi dago te God kuna konebeo, te me badu naga koneani. Tiali goli nosali da, te dago aga mu koneyu, te agai da mu konebo tiwai gilama yaibao.

¹³ Tama te sogo asisabadi, te kolesaga sela sesemane sogo elalubao, te homugo kea pabo kolesaga dali, te dwagi yai homu eyu bugagia tonalubo kolesaga dali, te we bidi dali wiegi yai homu eyu godolo ebo kolesaga dali, te augwali sela sesemane sogo elalubo dao. Tiali goli te kolesaga selade te polalubo kolesaga me deli, te gasa bidibolo wiegi yai homu eyu godolo ebo

kolesaga elalubo dao.

14

Te Godigo Tedali Mobo Bidigo mabo polalubo bomo sabo homu eyu, te dagego Godigo po godolo homu elama pusao po wai

¹ Te gasa we bidi dali wiegi yai homu eyu godolo ebo kolesaga da te polalubo kolesaga elalubaso, te dagego bomu eyu te kolesaga bugagia wali pao. Tama tiyu, dagego te Tedali Mobo Bidigo maiabo tau mabo bomu sabo homu bomu eyu godolo tigidali sogo iduao. Tiali goli te maiabo bomu dabe tomode te Godigo po gasa we bidi dabebolo pusubo bomu te polalubo bomu elalubaso, dagego te bomu sabo homu hasia yao.

² Magi baso meni, te tɔde bidibo we bidigo konesiabo po wabo bidi agai te we bidibolo te po wagobeo. Menio. Agai te po wabogo te Godibolo naga wabo dao. Magi baso meni, te we bidi augwaligo agai wabo po page konegobeo. Te Tedali Mobo Bidigo bomogo te agai te geme dualali po page wabo dao.

³ Me ma, Godigo po pusubo bidi, agai po te we bidibolo weyu, tama te pogo augwa homugo God dali kea pabo kolesaga tebolo bomu mabo dao, tama augwaligo kolesaga wiegi yai emainu homu hodolama, tama augwali homu nagame ilibo dao.

⁴ Te tɔde bidibo we bidigo konesiabo po wabo bidi, te aga digi naga tau sabo dao. Tiali goli te Godigo po pusubo bidigo, agai te Godigo po odo bo we bidi hani sese tau sabo dao.

⁵ Eno homugo dage tigidaligo te we bidigo konesiabo pogo po omainogo te homu godolo ebao. Tiali goli eno homugo te Godigo po dagego pusumainogo te homu mu godolo ebao. Magi baso meni, te Godigo po hania pusubo bidi agai te we bidi tau sabo se ebogo te we bidigo konesiabo pogo po wabo bidigo tau sabo se aiyaba elalubo dao. Tiali goli, te we bidi augwaligo te po page hania konemainogo eyu, bidi mego te po page begeleyu da, teda te usu da, te po pusubo bidi dali te we bidigo konesiabo pogo po wabo bidi dali sigo tau sabo se te tiwai si dao.

Dago Godigo po dena pogo pusao po

⁶ Eno ama dedeo, dagego te po homugo bugagia koneao. Ena te dage bidibo madi aselama, tama eno po te we bidigo konesiabo gasa pogo naga wainogo eyu da, tiali goli te Godigo enabolo waselali po meba te eno dagebolo wasiayu, ma eno wiegi yai kolesaga dagebolo masiama, ma te Godigo po eno pususiama, te eno dage me po ola masiabaso da, teda eno te we bidi konesiabo pogo wabogo dage bugagia tau sogobeo. Mu menio.

⁷ Te bidibo ula meni yai nai, te ona me gita, te tiwai naga elalubao. Te agai haniani po dolo bugagia wasiabaso da, teda dago magi ilama te agai dogonide wabo po bugagia odaibawe? Te usu egobeo.

⁸ Ma, te ami enesigi bidi dabe augwaligo te bu wabo nai biugel bu wabo odobo si, augwaligo konebo dao, te hwiabo sogo asai dao, te homu yaibao. Tiali goli ami bidi me deligo te biugel

naigo dolo hwa wasiꝓbaso da, teda dego te wꝓbi hwꝓabo sisi elaluaibawe? Bidi meni.

⁹ Dage me, dage te tiwai gilama naga yaibao. Dagego duga lotude te bidi dabego konesiꝓbo gasa pogo po obaso da, magi ilama augwaligo te po page koneaibawe? Menio. Teda dagego po olo madi hagagi paibao.

¹⁰ Mu tama, te haniani we bidi hani augwaligo te haniani po hauwa e tꝓde elalubao, dago te haniani po nedebo usu egobeo. Tiali goli te po me deli olo me elalubeo. Te tigidali pogo te page elalubao.

¹¹ Tialima, te bidi me deligo pusubo po page eno me konesiꝓbaso da, te agai homugo ena te gasa digibulu bidibo bidi hani da homu yaibao. Tama eno me eno homugo te po wabo bidi te gasa digibulu bidibo bidi hani da, te homu ebo dao.

¹² Dagego me dagego te we bidigo konesiꝓbo pogo po weyu da, teda dage tama tiwai ebo dao. Tialima, dagego te Tedali Mobo Bidigo olo maiabo tau sabo bomo dabe sainogo homu godolo yaligo da, teda Godigo we bidi hani bugagia dolalumainao homu eyu, dagego te augwali wiegi yai mu tau mabo bomo sabo homu bomonama eyu, tama te Mobo Bidibolo te bomo da mao weyu bidiꝓo.

¹³ Tama tibaso, te we bidi dabego konesiꝓbo pode po wabo bidigo, agai te po begelabo bomo somainogo eyu tama agai Godibolo te bomo ena mao po hanalu wao. Tama tiyu, tama agai te bomo sobaso da, teda agai te aga gasa pogo wabo po begelama, tama gasa we bidi augwaligo te po

page hania koneaibao.

¹⁴ Magi baso meni, eno te da we bidigo kone-
siãbo pogo Godibolo po weyu da, teda eno mobo
bidigo me te gedu haluasa po wabo, tiali goli
tebogo eno homu kolesaga tau sabo meni, te olo
elaluaibao.

¹⁵ Tama eno magi egowe? Te eno ena homu
ogwa wai dali te da we bidi konesiãbo pogo
Godibolo po weyu aga nogi ugwaba saibao, tama
ena homugo kone paliyu tama waibao. Eno aga
nogi ugwaba sabo tẽabi po te konesiãbo pogo
te eno homu ogwa waigo weyu, tama te eno
homugo dali me te tẽabi po waibao.

¹⁶ Te nago tama tisiãma, tama naga homu ogwa
waigo naga te lotu wabo sogode nago Godibolo
puba hwi po weyu da, tama tede bidibo olo bidi
me deligo te po konesiãwani da, teda magi ilama
agai te nago puba hwi po walide te “Amen, mu
dao” po agai wagowe? Te usu me egobeo. Agai
nago te wali po me konegobeo.

¹⁷ Mu tama, nago Godibolo po wali te wiegi
yai wali, tiali goli nago te po waligo te gasa bidi
homu tau siyu bomo me mabeo.

¹⁸ Dagego te da t̃de bidibo we bidigo dena
homugo konesiãbo pogo me sogo Godibolo po
wabo dao. Awe, te usu da. Eno me hauwa sogo
tama tebo dao, tama te sẽde eno dage aiyaba
elalubo dao. God agai te pogo po wabo bomo ena
mobaso, eno agabolo puba hwi po wabo dao.

¹⁹ Tiali goli te Godigo po odobo we bidi sisini-
bode, eno homugo te eno te augwaligo konesiãbo
po hauwa mu wagobeo. Menio. Eno homu e
tiwai dao, te dena pogo weyu, eno augwali tau

siyu, te ola mabo po bugagia ola momainogo eyu, te eno dwasianu pogo hania waibao, te usu dao.

²⁰ Eno ama dedeo, dagego te haniani sęde dagalabo homude dage te wai puluba tiwai me bidilamuo. Menio. Te dwai kolesaga ebode dage te dwasianu wai puluba bidibo tiwai bidao, te dwai kolesaga egimio. Tiali goli duga haniani sę ebo dagalabo homude, dage te genuai bidi tiwai pedaliąo.

²¹ Te Godigo bomai pode augwaligo te tiwai po polobadu asęai dao, te gasa konesiąbo pogo wabo kolesagade,

“Genuai Bidigo te po wai, “Te gasa po wabo bidigo pedauwalide, tama te gasa bidi hanigo pedauwalide

te eno po e we bidi hanibolo mawaibao. Tiali goli tebogo me usu egobeo, te augwaligo eno po wali me

pogobeo,’ agai te po wai.” *

²² Tama tibaso, dago koneani, te da tęde bidibo we bidigo konesiąbo gasa pogo po wabo kolesaga da, te muani sa dao, te Kraisba augwa homu tigidali musiąwai bagego augwaligo te tobage po wabo odoyu, tama augwaligo Godigo bomo meba sueibao. Me ma, te Godigo po pusubo kolesaga da, te me te muani sa dao, tama te po odoyu bugagia wali pabo we bidi augwaligo tedu koneaibao, augwaligo augwa homu tigidali te Kraisba mu muai dao.

²³ Tama tibaso, te dage Godigo po odo bo we bidi tigidali dage deli madi sisinama, tama

* **14:21:** Ais 28:11-12

dage te sogo po wabo bage tigidaligo we bidigo konesiãbo gasa gasa pogo po weyu, tama bidi mebago konesiãma, tama Kraisba augwa homu musiãwani bidi dali, augwali te tomoba asiyu da, teda augwaligo dagede te po waibao, "Dage esela pobao" waibao.

²⁴ Tiali goli, dage tigidali deli deligo Godigo po dena pogo pusubaso, tama Kraisba augwa homu musiãwani bage, ma bugagia konesiãwani bidi me deli, aga te tomoba asobaso da, teda dage tigidaligo pogo te bidi homude enaibao, tama dage tigidaligo pogo aga po tũ ela mabo tiwai eyu tama aga koneaibao, Godigo gedude aga dwai sę yali sęęę elalubao.

²⁵ Tama tigidali po aga homude geme dualaluali, te agai hania pusaibao. Tama aga ge neyu, aga gesabidiba basi gulama, tama God nogi ugwaba siyu, tama hanilama te po waibao, "Mu tama, God te dage tomode bidibao," agai te po waibao.

Te lotu po wabo sę tigidali dolo pedalomainao

²⁶ Ama dedeo, dagego magi yaibawe? Dage lotu po wainogo eyu sisinibo sogo, dage tigidali deli deligo te duga hasi tau sabo sę elalubao. Me deligo te Godigo nogi ugwaba sabo balia weyu, tama me deligo te dage po ola mabo sę eyu, tama me deligo te Godigo agabolo tamadi mani po, tama agai te po pusaibao. Tama me deligo te dago konesiãbo gasa pogo po weyu, tama mego te po begelebo sę elalubao. Dagego ebo sę tigidali ebogo te dage Godigo po odobo we bidi tau siyu bomo momainogo iyao.

²⁷ Tama mebago te da tɔde bidibo we bidigo konesiabo pogo po wainogo homu ebaso da, teda sigo ma selago naga yao. Te usu dao. Tama augwaligo po hodobo me olamuo. Menio. Me deligo bolo po hasia olama, tama gasa aga po nosali weyu yao. Tama bidi me deligo te augwaligo wali po page begelemainao.

²⁸ Tama te po begelabo bidi meni baso da, teda te we bidigo konesiabo pogo po wabo bidi te dage Godigo po odobo we bidi sisinani sogo po wabo pedauwali pania sao. Agai aga digi homu tomode God dali naga aga po mimainao.

²⁹ Tama te Godigo po pusubo bidi si ma sela, augwaligo te Godigo po pusumainao. Tama gasa bage augwaligo te pusali po dagaloyu tama osola suyu miao.

³⁰ Tama me deli dulaluali bidibolo, tama Godigo Mobo Bidigo po me deli agabolo te sogo naga ola mani po wainogo ebaso da, teda te hasia doligulama po wabo bidi, te aga wabo po silao, te Godigo agabolo po tamadi mani bidigo te mani po omainao.

³¹ Te kolesaga ebogo da, teda dage tigidali deli deligo Godigo po pusagameo, tama dage tigidali we bidigo koneama kolesaga selama, tama dage tigidali bomu somainogo yaibao.

³² Te Godigo po pusubo bidi dabe augwaligo augwa Godigo Mobo Bidigo nogode sali po pusubo bomu augwa digi tonalumainao.

³³⁻³⁴ Magi baso meni, Godigo te da dago lotu po wabode te subigila ebo homu me ilibo meni. Te menio. Agai da deli homude naga nagamea homu elama bidimainogo ilibo dao.

Te Godigo po odobo we bidi sisinibo sogo te we dabe sibigo po me olamuo, augwali pedauwali naga pania sao. Da Godigo po odobo we bidi hani te tigidali t̄de bidiyu, da tigidaligo tama naga tebo dao. Te we dabe sibi augwali te Godigo po odobo we bidi tomode me polalugobeo. Augwali te dologode bidao, te Juda dabego bomai pode wali po gilama yao.

³⁵ Te we dabe sibi augwaligo te lotude odali po me deli page koneainogo da, teda augwaligo augwa bidibolo augwa bede hanalu wao. Ma, te Godigo po odobo we bidi sisinibo sogo wego po obaso da, agai te dolo is̄awai hale ilibo kolesaga ebao.

³⁶ Awe, eno koneani, te dagego eno meḡi tama wali po bolobo dao. Te dage tomode te dage deliba sisinibo sogo te we mebago po pusubo dao. Magi basowe? Dage te Godigo wiegi yai gesi po page bage dagede da agawe? Dagego naga te Godigo po siyu, tama gasa we bidi augwali meni yaiba agawe? Te meni. Dagego te tigidali gasa t̄de bidibo Godigo po odobo we bidi hani augwaligo ebo kolesaga wali peyu, tama te we dabe sibigo lotu po obadi po pusubo habu selao.

³⁷ Tama bidi me deli aga homugo digi aga te Godigo po pusubo bidi da te homu ebaso, ma aga digi homugo te Godigo Tedali Mobo Bidigo agabolo te Godigo we bidi tau sabo s̄ agabolo mani, te homu eyu da, teda aga koneao, te po eno dagebolo meḡi as̄ani te Genuai Bidigo bomai po dao.

³⁸ Tiali goli aga te tiwai homu me is̄ayu da, teda dago me aga te Godigo po pusubo bidi da te homu

me egobeo.

³⁹ Eno ama dede dabeo, eno wali po page e dao: dagego te Godigo po pusubo se emainogo eyu duga homugo bomo elama godolo yao. Tama me, dagego te da tode bidibo we bidigo konesiabo gasa gasa pogo te Godigo nogi ugwaba sabo se te habu munu me selamu dao.

⁴⁰ Tiali goli dage deliba sisinama tama lotu po obadi, te subigila egimio, te se dodolama tama wiegi yai naga pedalomainao.

Te isali we bidi dabe augwali ma hodalueibao

15

(Daj 15)

Te Krai isilama tama ma hodaluali po

¹ Eno ama dedeo, megi eno homugo te eno dagebolo polobadu pusali wiegi yai gesi po, te po pagede dage homu ma hodolainogo eno homu ebao. Dagego te wiegi yai gesi po salio, tama dage tede bomu elama dolalubo dao.

² Tama Godigo te wiegi yai gesi pogo naga dage ma dobola siyu wiegi yai madiba mubao. Dagego te eno dagebolo pusali wiegi yai gesi po dali duga homugo mu kea peyu da, te pogo agai dage ma dobola saibao. Te dagego te tiwai isayu da, teda dagego olo naga Kraisba duga homu tigidali muyu agaba tialuali.

³ Te eno polasa po dagebolo hasia bolo mani, te eno me eno polobadu te po naga sali. Te po e tiwai dao: te Krai isilama dago dwai sege

tigidali sela samainogo yali, te Godigo po bukude polobadu aseani po tama usu nani. *

⁴ Tama augwaligo aga te masigi dedage gu pageba mugi pai. Tama sela sogo wabode Godigo aga ma hodolama, tama aga me bidibao, te Godigo po bukude polobadu aseani po tama usu numainogo yai dao. *

⁵ Tama nosali aga Pita bidibo madi pedalali, tama nosali te aga se bidi nogo si olama saqa badu si bidi bidibo madi pedalama augwaligo aga suali. *

⁶ Tama nosali ma dago ama dede hauwa dali augwaligo aga suali, te bidi sese hauwa 500 bidi augwaligo sualio. Tama te suali ama dede augwali meba nosali isiyu yai, tiali goli hauwa augwali megi me bidibao.

⁷ Tama nosali ma Jemsgo aga suali. Tama te sogo nosali aga seba tagala palali bidi dabego me aga sualio. Te tiwai aga isilama ma hodalu po eno dagebolo hasia bolo ola mani.

⁸ Tama augwaligo sula silama, tudi badu mu aga te ena geduba me pedalai, ena te wai boq tiwai te aga idago te ame nesiabo sogo ame nani. *

⁹ Magi baso meni. Ena da, ena te Godigo po sela pabo bidi dabe augwali tomode te dwasianu gagayali. Tama ena te bidi augwaligo te Godigo po sela pabo bidi nogi wabo usu me egi menio. Magi baso meni, polobadu eno te Godigo po

* **15:3:** Ais 53:5-12 * **15:4:** Tib 16:8-10; Mat 12:40; 28:16-17;

Mak 16:14; Luk 24:36; Jon 20:19; Tpi 2:24-32 * **15:5:** Luk 24:34

* **15:8:** Tpi 9:3-6

odobo we bidi hani dolobo se hauwa mu yai dao.
*

¹⁰ Tiali goli Godigo olo mu tau sabo kolesagago ena tau selama, tama agai ena megii bidibo tiwai ilali, ena te aga se ebo tagala palali bidi dao. Tama agai ena olo mu tau sali wiegi yai kolesaga te olo me hagabeo. Mu menio. Eno aga se bomo mu elama yai, te gasa Godigo po sela pali bidi dabe augwaligo yali se eno yali se ebogo aiyaba elaluali. Tiali goli eno ena digi me ebeo. Menio. Te Godigo olo tau sabo wiegi yai kolesaga ena dali bidiyu, agai naga te se ebo dao.

¹¹ Tiali goli te eno ma augwaligo te gesi wiegi yai po pusali, te tagalao. Te magigo meni. Da aga tagala palali bidi tigidaligo te Kraisde po naga pusubo dao. Tama dagego te pode naga konealubo po duga homugo daŋ olama tama Kraisba homu daŋ elalubo dao.

Nosali tigidali isali bidi ma hodalobo kole-sagade po

¹² Sesemane sogo da Godigo gesi wiegi yai po pusubo bidi dabe dago te Kraisi sama tama Godigo aga ma hodolali po pusubo dao. Tama tialigo da, magi ilama tama dage tomode meba augwaligo e tiwai tibo po weyu ebo dao: "Te isai bidi, aga ma hodalugobe, dago te homu ebo da," te po wabo.

¹³ Edao. Te isai bidi mu ma hodalobo usu menigi sogo da, teda Godigo Kraisi te gu pagede ma hodoligi meni da.

* 15:9: Tpi 8:3

¹⁴ Tama mu tama Godigo Krai ma hodoligi menigi sogo da, teda dago te pusubo po, te po olo nai tiwai gagagi da, tama dagego Krai de konealubo po daɗ olama agaba homugo tialubo kolesaga, te me te olo nai tiwai pedaligi da.

¹⁵ Tama te tiwai da wida, teda me da te Godigo po pusubode te da tibo po wabo bidi tiwai pedalaibao. Magi baso meni, dago te Godide po weyu tama dago te agai Krai te gɗ pagede ma hodolali po dago hanilama hania wali. Tiali goli Godigo te isai bidi ma hodolobo meni eyu da, teda agai te Krai me ma hodolobeo.

¹⁶ Awe, mu tama Godigo te isai bidi ma hodolobo meni da wida, teda Godigo te Krai me hodoligi meni.

¹⁷ Tama mu tama Godigo te Krai ma hodoligi menigi sogo da, teda dagego te Krai ba duga homu tigidali mubo kolesaga ebogo te duga tau sabo usu me egi menio. Duga dwai seɣe dali bididubadi gebo dao.

¹⁸ Tama me elalubao, te Krai de konealubo po daɗ olama isali we bidi dabe, augwali me hagawai dao.

¹⁹ Te Krai agai da ma dobola somainogo eyu, dago dena homu tigidali agaba munama tama agaba tialuyu, tama dwagi yai homu eyu aga ma asobo tonalubo dao. Tama tebogo da e tɔde bidibo sogode naga da tau siyu da, teda da hobodagia mu bidibao. We bidi augwaligo da dali homu dene ebogo te gasa we bidide homu dene ebo se aiyaba elaluaibao.

²⁰ Tiali goli te tiwai me egobeo. Mu menio. Te Krai isali, tama mu tama Godigo aga te isai we

bidi tomodu ma hodolali. Aga te isali we bidi dabe hodalomainogo te hasia polasa hodaluai bidi aga dao. Tama te gide nai inabo hasia pedalali nai tiwai aga te gū pagede hasia mu ma pedalai dao. Tama tibaso, dago koneani, agade konealubo po daḡ wali we bidi tigidali augwali me te Godigo ma hodolaibao.

²¹ Magi baso meni, te bidi deli Adamgo yali seḡe tedu te isibo kolesaga pedalali, tama te tiwai me te gasa bidi me deli Kraisgo yali seḡe te isai bidi ma hodaloabo kolesaga me pedalalio.

²² Te e tama tiwai: te Adamgo bulai wai augwali tigidali isibo bage dao. Tama tiali goli Kraisgo we bidi hani augwali tigidali bidibo ula saibao.

²³ Tiali goli da tigidali we bidi deli deli te da ma hodaluama, tama dena sogo tede te bidabo ula saibao. Te hasia bolo polalubo te Krai aga ma hodaluama tama bidabo ula sai dao. Tama nosali aga ma asobo sogo, da aga hani tigidali ma hodaluaiabao.

²⁴ Tama te sogo tigidali nai silaibao. Tama Kraisgo te gavman seḡ tigidali silibadi, tama te haniani tobolu bidi seḡ ebo tigidali badi, tama tigidali bomo dola silibadi elama, tama agai aga tigidali nai tonalubo bomo me ula te Aya Godigo nogoba muaibao.

²⁵ Magi baso meni, Krai te tuni bidi bidimainu eyu, tama bidada pidubadi tama Godigo te boi bidi tigidali augwali aiyaba elaluama siligi pabo si usu nigī paibao. *

²⁶ Agai te gasa boi bidi dabe augwali tigidali

* 15:25: Tib 110:1

dolobode da, teda agai te isibo kolesaga me sia saibao.

²⁷ Magi baso meni, te Godigo po bukude te tiwai po wai, “Godigo tigidali nai te aga dologode muaibao” wai. Te aseani pode te Godigo tigidali nai te Krai dologode muaibao po wai. Tama tialima dago hania koneani, Godigo tigidali nai te Krai dologoba muani, tiali goli God aga digi te Krai dologode me bidigobeo. Menio. *

²⁸ Tama nosali Godigo tigidali nai Krai dologode munama silibo si da, teda God aga Ogwa digi te God dologoba pelama, te tigidali nai aga dologoba munama, tama God te tigidali nai dali, tigidali we bidi dali tobolu bidi mu bidimainogo yaibao.

²⁹ Edao. Te Godigo te bidi dabe te gu pagede ma hodaluaibao po te mu po menigi sogo da, magi baso te meba bidibo bidigo te isali bidi tau somainogo eyu baptais sabo dawe? Te mu tama te isai bidi munu me ma hodalugobe da weyu da, teda magi baso te isai bidi dabe tobade te bidibo bidigo augwali tau somainogo eyu baptais sabo dawe?

³⁰ Tama ena dali, te ena dali deli se ebo bage me, da me sesemane sogo bidi mebago da dolainogo ebo dao. Te isai bidi ma hodoligi menigi sogo da, teda magi baso da e tiwai bidaibawe? Te isai we bidi ma hodoligi menigi sogo da, teda te Godigo pode boi bidi homu ebo bagego da dene me maidali weyu dago e se tagaligi da.

³¹ Ama dedeo, te tigidali sogo te ena dali

* 15:27: Tib 8:6

boi homu ebo bagego dene mabo homu ebaso, te tigidali sogo deli deli ena isigowe, te eno konesiabadi ena tama bidibo dao. Te po mu po naga dao, te eno dagede ebo homu te mu tama dao tiwai. Mu tama, da tigidali dago Genuai Bidi Krai Jisasde tia selama bidibo tama eno wiegi yai homu pemene dagebolo mu ebo dao.

³² Ena e moni hanu Efesusde polobadu bidibadi, te Godigo pode boi bidi homu ebo bagego ena dali dwai se yali, augwali te bulude bidibo dwai hui digi ebo hasa dabe tiwai yali. Tama eno tode bidigo homu wali naga pigi sogo da, teda te sege tolobogo ena mena tama tau sogowe ena te homu egi da. Tama tiyu, mu tama te isai bidi dabe ma hodoligi menigi sogo da, teda "Da do ma tamadi isibaso, tagalao, dago te nai me we me subigila tuinao," te homu egi dao. *

³³ Augwaligo dage te tobage tibo po ola mabo gogolamuo! Bidi me deligo te dwai kolesaga ebode polobadu wali po te mu po naga dao. Agai te po wai, "Te da dwai bidi dabe dali kisasa biliyu da, teda augwaligo dwai kolesagago dago wiegi yai kolesaga ebo dolaibao," agai te po wai.

³⁴ Dagego te wabo pabo kolesaga tagalama tama dolo homu kolesaga yao. Dagego dwai se ebo tagaliao. Dagego odao. Dage tomode meba augwaligo te Godigo te isai we bidi ma hodalugobe po wabo bage, augwaligo God kuna konebeo. Te dage hale ilainogo eyu eno te po dagebolo obao.

Te isali tigi gasagi yai ma hodaluaibao

* 15:32: Ais 22:13

³⁵ Tiali goli bidi me deligo te tiwai po hanalu waibao, “Te Godigo po wali pali isai we bidi dabe augwali mena tama hodalugowe? Te augwali mena tiwai tigi selama ma hodalugowe?” agai te po waibao.

³⁶ Te eno te po wei ponoyu e po obao: nage kolesaga meni yai bidi dawe? Nago hanalu wali po si te kidu meni yai po naga dao. Naga digi te nai yiyu ge bulubo naga koneani, tama te nai ge bulama tama t̄q tomode te ge peda pelama tama kulubi holisiayu da, teda te holabo yiyu aga bidabo ula me sogobeo.

³⁷ Tama nago te ge naga bulubo dao, te nosali pedalobo sese nai tigi bulubo meni. Te menio. Nago olo ge naga bulali, te yiyu ge, ma gasa nai ge me te olo ge naga bulubo dao.

³⁸ Tama Godigo digi aga homugo te yiyu gede pedelabo yabe dodolama nigali, te aga digi homugo koneama te tiwai yali. Tama agai haniani yabe te haniani nai wai tigidali deli delibolo mabo dao.

³⁹ Tigidali t̄qde elalubo naigo tigi te deli nai tigi tiwai naga me elalubeo. Menio. Te bidigo tigi gasagi yai me tedali elalubo, tama hasa dabego gasagi yai me tedali, tama ba dabego gasagi yai me elalubo, tama s̄ḡu dabego me gasagi yai tedali tigi elalubo dao.

⁴⁰ Tama dagalude nai dabe me t̄qde nai dabe me tedali elalubao. Tiali goli te dagalude nai dabego au yali te deli tigi poai elalubo, tama t̄qde nai dabego au yali te gasagi yai tedali elalubao.

⁴¹ Te giligago au yali te deli tigi poai elalubo, tama poluago au yali te gasagi yai me, tama te

họ dabego au te gasagi yai me elalubo. Tama họ dabego au me te gasagi gasagi yai elalubao.

⁴² Te Godigo te isali we bidi dabe ma hodolobo kolesaga me, te tiwai naga yaibao. Te tigi dago te nai ge tiwai pubalobo, te dolaibao. Te ma hodalobo tigi te gasagi yai dao, te munu me dologobeo, te gamonabo tigi dao.

⁴³ Te tigi dago pubalobo, te sawi isawai dwai mu yali. Te ma hodalobo tigi, te wiegi yai sawia pai mu yaibao. Te dago tọba pubalobo tigi, te bomo me elalubeo. Te ma hodalobo tigi, te bomo hauwa elaluaibao.

⁴⁴ Te tigi dago pubalobo, te tọde bidabo tigi naga pubulaibao. Te ma hodalobo tigi, te dagalude bidabo tigi elaluaibao. Te tọde tigi elalubo, tama tibaso dago koneani, te dagalude bidabo tigi me elalubo dao.

⁴⁵ Te Godigo po bukude așani pode me te tiwai po wai, “Te polasa hasia bidi, Adam, te bidibo ula elalubo bidi pedalai,” te po așani. Tama nosali mu pedalali Adam aga te bidibo ula mabo mobo bidi pedalali. *

⁴⁶ Tiali goli te bidibo ula mabo mobo bidi te hasia me pedalobeo. Menio. Te e tọde bidabo ula te hasia pedalali. Tama bidibo ula ebo mobo bidi noma te nosali badu pedalaibao, aga te tọde bidabo ula hasegelaibao.

⁴⁷ Te hasia polali bidi Adam te e tọde bidibolo polali. Godigo tọgo naga aga nigali. Nosali pedalali bidi te agade Adam si wabo bidi, te aga dagalude bidai bidi dao, tedu asai dao.

* **15:45:** Gag 2:7

⁴⁸ Da tɔde we bidi tigidali, da te Godigo te tɔgo nigali bidi Adam tiwai pedalali. Tama da Kraisgo we bidi hani bage, da te dagaludu asali bidi Kraisi tiwai mu pedalaibao.

⁴⁹ Tama megi da te Godigo tɔgo nigali bidi Adam tiwai dao, dago elalubo tigi te agai elaluali tigi tiwai si naga dao. Tama te tiwai naga me dago te dagaludu asali bidi Kraisi aga tigi tiwai naga digi dago nosali saibao.

⁵⁰ Ama dedeo, eno megi wali po page e dao: te e tɔde bidabo tigi naga elalubo bidi te Godigo we bidi tonalubo madide bidibo usu me egobeo. Tama te gamonasiabo tigide bidibo bidi me gamonogobeo.

⁵¹ Dagego odiao. Eno geme dualali po me deli dagebolo pusubao: te da tigidali me isigobeo. Tiali goli Godigo da tigidaligo tigi te hasegelama te gasagi yai tigi me pedalaibao,

⁵² polo mu, bidigo gedu gagamu ebo tiwai, te tɔde dagalu si silibo sogo te bu wabo nai biugel po wabo sogo tiaibao. Awe, te bu wabo nai biugel po waibao, tama te Godigo po wali pali isali we bidi augwali gu pagede hodaluwaibao, tama augwali munu me dologobeo, te augwali gamonaibao. Tama da me bidibo bage, dago tigi hasegelama, gasagi yai mu pedalaibao. *

⁵³ Te e tiwai: te dolobo tigi, te hasegelama tama te dolisiabo tigi pedalama, tama sesemane sogo bugagia bidimainogo emainao. Te isibo tigi te hasegelama, tama gamonabo tigi ulade bidimainogo emainao.

* 15:52: 1 Te 4:15-17

⁵⁴ Mu tamao, te dago elalubo tigi, te dolobo tigi, te hasegelama sesemane sogo bugagia bidaibao. Tama te isibo tigi te hasegelama te gamonabo tigi pedalama tama sesemane sogo bidaibao. Te tebo sogo te Godigo po bukude aseani po me deli te usu nagasaibao. Bukude te po wai:

“Godigo te wabi hwiiani bomo elama, tama te isibo kolesaga te aiyaba elaluama, tama tigidali mu silalio.” *

⁵⁵ Bukude po me e tiwai elalubao, “Nage da, isibo kolesaga, tama nago te we bidi aiyaba elaluabo se mena elalubawe? Menio! Te mu silalio! Nage da, isibo kolesaga, te nago dene mabo bomo menawe? Te menio! Te aiyaba elalualio!”* Te po bukude aseani.

⁵⁶ Tode we bidi augwaligo te isibode magi baso wi ebo dawe? Woo, augwaligo koneani, augwaligo dwai se eyu bidibaso, nosali augwali dene saibao. Augwaligo dwai se yali, te augwaligo mena tama koneaniwe? Te Godigo Mosesbolo mani bomai pogo te dwai se yali page augwali hania waselebo dao.

⁵⁷ Tiali goli Godibolo dago puba hwi po wao! Te dago Genuai Bidi Jisas Kraisgo yali se de, te Godigo da bomo mobaso, tama dago te boi bidi, te isibo kolesaga, te dago aiyaba elalubo dao.

⁵⁸ Eno ama dede muo, te da nosali ma hodalu-ama tama tebogo te isibo kolesaga aiyaba mu elalubaso, megidage bomo elama bidiyu, tama

* 15:54: Ais 25:8 * 15:55: Hos 13:14

wi homu eyu dwasianu ibaba kila selamuo. Te dagego Genuai Bidigo sę dene ebo, te olo me tagalogobeo, te sę ebogo aga du mu walaibao. Dagego te tiwai koneama, tama sesemane sogo dagego dago Genuai Bidigo sęde sę bomu mu yao.

Polgo homugo mena sę dabe agai igi da, homu yali po

16

(Daj 16)

Polgo te Godigo we bidi tau sabo masigi po wali

¹ Dagego ena te Judia tęde bidibo bage tau sabo masigide po hanalu wali. Megi eno te po wei ponoyu, dagego te sisinama Godigo we bidi augwalibolo mawainogo ebo masigi po wabo elalubao. Te sę yabo sunumi eno te Galesia moni tęde bidibo Godigo po odo bo we bidi hani dabe augwalibolo ola mani, tama dagego me te tiwai gilama yao. *

² Te tigidali Sande dage tigidali deli deligo te hasia Sarere sę elama sali mone tede homugo koneama, tama te bugulama tama me badu te duga bede bugagia munalumainao, te tiwai saboao. Tama nosali ena sabolobode, teda dagego augwali maiabo mone gegebo sę me egobeo.

³ Nosali ena dage bidibo digi sabolobode, teda duga digi te mone sela pabo bidi meba nogo tų elama, dagego te tau sabo masigi dabe te moni hanu Jerusalemba sela pomainogo yaibao. Tama

* **16:1:** Rom 15:25-26

dagego pas dabe asenama, tama augwalibolo menama, tama augwali teba tagala palaibao.

⁴ Tama ena me ena pabo homu ebaso da, teda augwali ena dali hodobo paibao.

Pol pelama Korin dabe suainogo homu yali

⁵ Eno tede se me elalubaso, eno e bulu Efesus tagalama tama hasia ena te Masedonia moni to pedai teba paibao. Te moni to tomodu biliyu, tama tede eno se silibo si, tama ena dage bidibo madi pedalaibao. *

⁶ Tama sabolama, tama ena dwasianu sogo te dage dali bidabo homu ebaso. Ena kuna konebe, te ena dage dali bidibadi te moni kedau ebo silibo sogoba usu nagasaibao homu yai. Tama nosali ena gasa buluba se egi paibao, te mena bulu te megi eno konebeo. Tialima ena gasa buluba painogo ebode, teda dagego te pabo sunumiba ena odasa pelama, tama tau siyu tagaligi pagameo.

⁷ Ena megi te Masedonia toba pobadi ena dageba asigi sogo da, teda ena dage dali dwasianu sogo naga bidibo usigi da. Te ena hagelabo. Dago Genuai Bidigo usu da po obaso da, te ena Masedonia tode elalubo se silama tama dageba asama, tama ena dwasianu bobage sogo dage dali bidabo homu ebaso.

⁸ Tiali goli ena e Efesus bulude bidibadi te Juda dabego moni nai tubo sogo nogi Pentikos pedalobo sogoba usu nagasomainu homu ebo dao.

* 16:5: Tpi 19:21

⁹ Magi baso meni, Godigo eno sunumi dalobaso, tama eno te we bidi hauwa te Godigo po wali pomainogo tau sabo sę genuai elalubao. Tama ena dali boi bidi homu ebo bidi dabe me hauwa ede elalubao.

¹⁰ Te nosali Timoti dage bidibo madiba pedalobo si da, teda dagego bugagia tonalu te aga dage tomode wi isąyu homu nagame elama dua digi bidimainao. Magi baso meni, agai Genuai Bidigo sę eyu, te eno digi ebo sę tiwai ebo bidi dao.

¹¹ Tama tibaso, bidi me badugo aga te olo nai tiwai bidi da homu eyu, tama aga tudiba me munamuo. Menio. Dagego aga homu nagame ilama, tama nosali aga te enaba asabo sunumiba bugagia tagalagaselama, tama aga ena pageba asomainogo yao. Eno te ama dede meba dali aga asobo tonaluaibao.

¹² Tama dago ama Apolos, te agade po te tiwai dao: te hauwa sogo eno po agabolo bomo elama weyu, te aga ama dede dali augwaligo dage suagasomainogo po wai dao. Tiali goli aga pabo hagela homu mu yai. Nosali, te aga pabo sogo suali usu ebaso da, teda aga dageba sabolagasaibao.

Po silagasu wabo po wai

¹³ Dagego bugagia tonaluyu, tama te Kraisde konealubo pode bomo elama bugagia dolaluaao. Dage bidi mu sesemane sogo bidiyu, tama bomo elama bidaloao.

¹⁴ Tigidali sę dagego ebo, dagego dwagi yai homu te Godibolo me te we bidi dabe augwali dali eyu, tama dagego duga sę tigidali iduaao.

¹⁵ Ama dedeo, dagego te bidi Stefanas dali aga hani dali koneani, augwali te gasa Akaia t̄o pedai hani bidi dabe augwaligo Godigo po wali pabo gaganis̄abadi te augwalibolo polasa te Godigo po wali pabo hani we bidi pedalama tama megi bidibao. Tama augwa digi homugo augwaligo te Godigo po odobo we bidi augwali tau sabo s̄e salio. Eno homugo dage te tobage we bidi augwali

¹⁶ dologode bidimainogo homu ebao, tama tigidali bidi dabego augwali tau selama, tama te s̄ede s̄e bomo elama ebo dao.

¹⁷ Tama Stefanas me Fortunatus badi te Akaikus, te bage augwali ena bidibo madi asali, tama eno homu wiegi yai pemene yalio. Magi baso meni, dagego ena tau somainogo eyu eba asabo te usu is̄abaso, tama augwali selago dage hasegelama, tama augwali ena bidibo madi asai dao.

¹⁸ Augwaligo ena homu me, tama dage homu me nagame ilali. Tama tiyu dagego te tobage tiwai bidi dabe augwali nogi ugwaba sao.

¹⁹ Te moni t̄o pedai Esiade te Godigo po odobo we bidi augwaligo te giligade dao po dagebolo obao. Te Akwila de aga we Prisila dali, te Godigo po odobo we bidi te augwali sigo beba sisinibo bage, augwaligo dage dali dwagi yai homu eyu, dagebolo te Genuai Bidigo nogide siade dao po hauwa obao. *

²⁰ Tama tigidali Efesusde bidibo ama dedego siade dao po dagebolo wali. Te da Godigo we bidigo kolesagade, dage tigidali deli deligo te

* **16:19:** Tpi 18:2

ama dedebolo wiegi yai homu eyu augwali nogo mayao.

²¹ Ena Pol da, te ena digi eno nogogo te siade da po asena dagebolo tolobao.

²² Bidi me deli aga homugo te dago Genuai Bidi Krai dali dwagi yai homu ebo hagela homu eyu da, te bidi agabolo dwai se pedalomainao. Genuai Bidi, nage asao!

²³ Te eno homugo te Genuai Bidi Jisasgo olo tau sabo wiegi yai kolesaga te dage dali bidao.

²⁴ Te Krai Jisasgo yali se de te da tigidali hodobo deliba wadoloyu bidibo dao. Tama tiyu, eno dage dali dwagi yai homu eyu godolo eyu bidibao.

Godigo dwagi yai po buku
The Holy Bible in the Dadibi Language of Papua New
Guinea

Buk Baibel long tok ples Dadibi long Niugini

copyright © 1987, 2001 Wycliffe Bible Translators, Inc.

Language: Dadibi

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-22

PDF generated using Haiola and XeLaTeX on 18 Apr 2025 from source files dated 31 Aug 2023

f3fb5335-7c77-5120-883d-cc05478d7362